

萬 有 文 庫

第二集七百七種

王 雲 五 主 編

萬曆重修二百二十八卷本

明 會 典

(五十二)

申時行等重修

商務印書館發行

萬曆重修二百二十八卷本

明會典

(五十二)

申時行等重修

國學基本叢書

明會典卷之一百三十一 兵部十五

【鎮戍七】

【各鎮通例】

凡烽墩。洪武二十六年定。邊方去處。合設煙墩。并看守墩夫。務必時加提調整點。廣積稗草。晝夜輪流。看
望。遇有警急。晝則舉煙。夜則舉火。接遞通報。毋致損壞。有誤軍機聲息。○永樂十一年。令築煙墩。高五丈。
有奇。四圍城一丈五尺。開濠塹。釣橋門道。上置水櫃。煖月盛水。寒月盛冰。墩置官軍守瞭。以繩梯上下。○
天順二年。令墩上設懸樓。礮木塌窩。賺坑。○成化二年。令邊墩舉放烽砲。若見虜一二人。至百餘人。舉放
一烽。一砲。五百人。二烽。二砲。千人以上。三烽。三砲。五千人以上。四烽。四砲。萬人以上。五烽。五砲。傳報得宜。
致尅敵者。准奇功。違者處以軍法。○正德八年。題准。各衛新增墩臺。務要摘撥相應。衛所正軍前去瞭守。
如無軍。就僉餘丁充守。一例與正軍關支糧賞。仍將別處老疾軍人。揀退。省下糧賞。以補前費。
凡聲息。洪武年定。各邊飛報一應聲息。具奏行移隄備。其有重大賊情。應出師征勦。及地方軍馬數少。應
調兵策應。奏請定奪。○嘉靖八年。議准。今後各鎮將官。須要選委的當。夜不收。遠爲哨探。具實奏報。或有
重大聲息。失於飛報。致誤事機。或本無聲息。虛傳妄報。空勞士馬。虛費錢糧者。聽兵部查考參究。

凡牆堡。景泰元年。令各邊每歲四月八月。遣官軍修葺邊牆墩堡。增築草場封堆。時加巡察。如有越塞耕種。移徙界至者。治罪。○嘉靖三十三年。題准。今後各邊修理牆垣墩臺。兵部酌量緩急。應否并實費多少。及該鎮處。辦有無足欠。奏行戶部查議。除備給京邊緊急支費外。以十分爲率。動支七分五。兵部二分五。近例戶部七分。兵部三分。

凡操練。成化二十一年。令各邊每年自九月起。至明年三月止。俱常川操練。四月初。具操過軍馬。并大風大雪。免操日期。奏報。○正德十三年。奏准。通行天下各府。與衛同在一城。各州縣與守禦所同在一城者。聽各掌印官。每月二次。赴軍衛教場。將原選民壯機兵。會合官軍操練。分巡分守等官。按臨之日。亦要不時點閱。○嘉靖八年。議准。各邊鎮巡官。嚴督各該將領。將見操官軍。逐一簡閱。挑選膂力。驍勇弓馬熟閑者。定爲頭撥。膂力弓馬稍稱者。定爲次撥。其有衰老懦弱庸鈍者。即便退黜。別選精壯。以飭武備。凡班軍。成化四年。令沿邊備操官軍。一年一班。每班以十月初到。明年十月滿。復留與次班守冬。至後年正月放還。以後班次皆然。○弘治十三年。令各邊備禦官軍。失班不到者。拏獲問罪。免其納鈔的。決解送各邊鎮巡官。查審軍一班不到者。在原備邊處。罰班五箇月。軍兩班。官一班不到者。改撥沿邊城堡。罰班八箇月。軍三班。官兩班以上不到者。極邊城堡。罰班一年。其補班月日。各另扣算。若來遲。不會失班者。止補來遲月日。○嘉靖二十六年。題准。河南防禦宣大官軍。各該衛所。務選精壯。補足原數。春班者。改於五

月初一。日上班。十月終放。回秋班者。改於六月初一。日上班。十一月終放。回。

凡戰守。正統六年。令出境勦賊。鎮守總兵官參將內。止遣一二員。仍留一二員居守。以備不虞。○嘉靖八年。題准山西三關軍馬數少。各鎮非有十分緊急。不許輕調。其宣大兩鎮。遇有賊情緊急。彼此依期發兵。互相應援。若敢偏私執拗。自分彼此。失機誤事者。參究重治。○二十一年。議准今後賊果深入。聲勢猖獗。方許合兵搗巢。制其內顧。若尋常無事之時。止照舊例施行。○隆慶五年。題准今後虜犯南山。責成本山副總兵督率主兵。并入衛官軍拒堵于內。東路援兵遊兵攻戰于外。該鎮正奇遊兵。遏勦于左。軍門標兵并調山大正兵。北樓援兵。衝擊于右。如南山無警。而虜窺宣大。則宣府正奇遊兵一體調遣。不得藉口南山。自分彼此。坐失事機。虜或東西分犯。仍當以南山爲重。總督親率標兵相機策應。而山大二鎮聽各巡撫徑自調度戰守。若犯薊東。山大遼東兵馬暫免入援。或犯薊西。則山大兵馬仍當星馳策應。仍留各鎮守兵分投搗巢。牽彼內顧。以求全勝。

凡防禦。正統十四年。令每歲七月。兵部請勅各邊遣官軍往虜人出沒之地。三五百里外。乘風縱火。焚燒野草。以絕胡馬。名曰燒荒。事畢將撥過官軍燒過地方造冊奏繳。○又令每年十月。兵部請勅各邊鎮守總兵巡撫官。遇冬年節。不許宴樂。仍轉行分守守備官一體遵守。

凡巡閱。宣德七年。令居庸山海關。荆子村。黑峪口。北抵獨石。西抵天城。每三月。差武官二員。御史二員。點

視。○成化二十二年。令各邊軍馬數目。遠邊一年一報。近邊半年一報。兵部每三年一次具題。差文武大臣各一員。同行閱實。每年一次。具題差御史二員。分行巡視。有設置未備。器械未精。軍伍不足。守卒年久未更代者。逐一查理。○嘉靖三十三年。奏准。差兵部侍郎一員。帶司官二員。前往薊州保定行邊。將一應戰守事宜。相度計議。如修築城堡。給發錢糧。易置將領。悉聽便宜施行。○隆慶五年。題准。虜衆內附。邊患稍寧。嚴飭各邊督撫將領。整頓邊事。將積錢糧。修險隘。練兵馬。整器械。開屯田。理鹽法。收胡馬。散逆黨等八事。從實舉行。以後三年一次。分遣才望大臣。或風力科道官三員。一往延寧。甘。固。一往宣。大。山西。一往薊。遼。保定。閱視回奏。果著有勞績。與擒斬同功。若仍襲故常。與失機同罪。○萬曆十二年。題准。閱邊官員。查照原限。各寬一月。延寧。甘。固。十一箇月。宣。大。薊。遼。六箇月。行令遍歷各鎮。○十三年。令閱邊差官。暫罷。勅各該巡按御史。徧閱所屬地方。邊備。及查盤錢糧。稽覈工程。一併奏報。該部覆請。分別賞罰。○又令。巡撫總兵官。俱依期巡閱沿邊地方。不許專駐一城。

凡邊臣職守。正統六年。題准。總兵官及各參將。不許管理官民詞訟。○弘治十三年。令在外軍民詞訟。除叛逆機密重事。許鎮守總兵參將守備等官受理外。其餘不許濫受。輒行軍衛有司問理。○十七年。令各邊將官。有包納糧草。與販馬匹等弊。巡按御史訪實參治。○嘉靖十年。議准。今後各邊巡撫總兵。主將偏裨。務要遵守協同事宜。節制舊例。如有奸徒。不務協同供職。左道阻撓。搖撼人心。及抗違節制。巡撫官指

實奏聞。被劾人員不許罵捏別項事情。摭拾誣辯。如事干軍機。副參以下故意阻撓。主將號令者。雖未敗事。亦以違令究治。罷黜。敢有挾制奏訐者。原詞立案不行。若總兵官挾私凌虐。偏將撫按官指實彈劾。究治。○十四年議准。今後總制巡撫總兵提督等官。如遇陞遷降革養病等項事故。例應去位者。俱要守候交代。方許離任。○十五年議准。各鎮守備官。但有託疾避難。擅離信地者。改調極邊衛分帶俸差操。三年之後。果能改過自新。收回原衛。○十六年議准。今後經過河西公差人員。不許擅騎塘馬。及私用操夫。各該守備把總等官。敢有私意奉承。致誤軍情者。並聽撫按官從重究治。○十九年。令與邊境相連地方。有司官員。但係軍前應備事宜。務要悉心幹理。若自分彼此。致誤軍機。聽本管上司參奏治罪。

凡邊臣奏請。所司俱要五日內議覆。不許停閣阻撓。致失機宜。○隆慶六年題准。各邊鎮督撫等官。但係軍機。俱要密封完固題奏。不得預先漏泄。通政司上本。與司禮監發本。俱要一體嚴密。

凡參隨伴役。成化二十年。令官舍隨任者。鎮守官許五人。分守許三人。其軍伴。鎮守官二十名。分守十五名。守備十名。○弘治十三年奏准。凡各處鎮守總兵官。跟隨軍伴二十四名。協守副總兵二十名。遊擊將軍。與分守官十八名。守備官十二名。俱不許額外役占。及賣放軍人。辦納月糧。違者許巡撫巡按官。查照軍職役占賣放事例。上請。其巡按御史。年終仍將各官有無多占賣放緣由具奏。○嘉靖十四年。令凡提督軍務。有違例奏帶。并要求者。兵科執奏參覆。從重治罪。仍行各該邊方鎮巡等官。通行查革。不許容情。

隱護。○二十二年。令各處參隨。止是鎮守將官。准帶五名。分守總兵。帶三名。俱係在京受命者。方許。若到邊年久者。不許奏討。

凡軍前報効。嘉靖二十二年議准。廢棄將官。除死罪重犯不議外。其餘總兵以下。千百戶以上。不分充軍立功。革職閒住。但屢歷邊方。曾經戰陣者。逐一查出。責令自備鞍馬。隨帶家丁。應付廩給口糧。各赴軍門酌量委用。果能建立奇功。釋其前罪。仍照例陞賞。若事寧無功。發回原衛。及各配所原係閒住者。照舊閒住。係充軍立功者。照舊充軍立功。以後內外諸司。問理失事。將官情輕者。務要即時釋放。使之立功贖罪。如果罪惡重大。亦要速議處置。不得濡滯。其總兵遊擊家丁。臨陣一體處給口糧。○二十六年題准。各衛閒住將官。謀勇可用。及懲創既深者。聽總督提督巡撫官。調取軍門。令其分哨領軍殺賊。果能建立奇功。一體保薦錄用。○二十八年題准。東西二關土著居民。有能率衆報効。招至一百名以上者。給冠帶。三百名以上者。授散官。防禦隘口。遇有警截殺。百里之外。給與行糧。有功之日。查照防秋事例陞賞。○隆慶二年題准。凡行伍衆軍。四方諸色人等。但有才能出衆。敢自誓領兵殺賊者。即暫假以頭目。任意選練人馬。臨陣即令當先。有功之日。聽督撫官具奏超陞。如臨陣退縮。許即時斬首。

凡邊境田土。成化十年。令陝西榆林等處。近邊地土。各營堡草場。界限明白。敢有那移條款。盜耕草場。及越出邊牆界石種田者。依律問擬。追徵花利完日。軍職降調。甘肅衛分差操軍民。係外處者。發榆林衛分

充軍係本處者。發甘肅衛分充軍。有損壞邊牆。私出境外者。枷號三箇月發落。○弘治六年。令廣東高雷廉肇四府。但有招接獵人過江佃種無主荒田者。招主窩主俱發雲南邊衛充軍。該管官吏里老。止是失於覺察。照常發落。若知情受贓。照例充軍。○嘉靖二十五年。題准各邊荒地。任民儘力開墾。永不起科。其舊曾起科。今荒蕪者。召民一體開墾。應納子粒。准蠲免十年。不許徵擾。待有成熟。奏來定奪。邊臣敢有變亂者。巡按御史參奏。拏來重治。○二十六年。令以大同修築邊牆。隔還虜占地土四萬餘頃。分給各邊守備五頃。把總坐堡官二頃。管隊官二頃。軍人二頃。或一頃五十畝。或一頃。永不起科。○二十七年。令以宣府龍門一帶修完邊牆。隔還營腴地土。分撥附近官旗軍民舍餘耕種。三年成熟之後。每頃止徵牛具銀五錢。不及頃者。遞減。永不起科。就便築立堡寨營房。聽從居住。正軍仍隸原衛所。食糧舍餘民人。不許差操。如遇防秋。量借一丁備禦。

凡招降夷人。嘉靖二十二年議准。凡虜中有智謀出衆。率其黨類歸附者。計其衆寡。除稿賞外。仍加陞級。如十人。卽與小旗。百人。與百戶。有能斬其酋首來獻者。賞銀一千兩。仍陞都指揮。職銜以示優異。○二十五年。令凡妄殺降人者。照故殺律抵死。各邊將領部下收回降人一千名以上者。陞二級。五百名者。陞一級。其餘遞賞。○三十三年。題准投降夷人賞賜。男子每名素紵絲衣一套。綿布十疋。鈔一百錠。婦女每口綿布三疋。鈔十錠。男婦每名口米三石。牛二隻。羊五隻。柴五百斤。仍撥房屋床榻器皿等件。居住并應用。

鈔布衣服。○隆慶四年題准。凡將領收夷人爲家丁者。有斬獲戰功。止許從厚給賞。不得濫議陞用。凡逃回人口。嘉靖十九年。詔各邊走回人口。有被邊將藏匿殺死。以圖報功陞賞者。撫按官舉奏得實。照殺降抵死。○二十二年議准。各邊有自虜中逃回者。審其鄉貫來歷。願歸者。給文遣歸。倍加存恤。不願歸者。收作通事。給與月糧。帶來一應馬匹衣服等項。盡數給與。雖有藏匿。悉置不問。仍審其進邊日期。及有無措勒。以憑查究。○二十四年題准。提墩官督同墩軍。遇有虜中逃回人口。即便伴送入境。每名給銀二兩。免其差徭。隨帶馬匹衣物。盡數給與。提墩官賞銀二兩。墩軍賞銀五錢。二名以上倍給。如傳報事體得實。一體加賞。○二十五年。令凡大邊招徠精壯男子一名者。賞銀三兩。遞加至十五兩而止。幼男婦女。賞銀二兩。遞加至十兩而止。邊墩引進精壯男子一名者。賞銀二兩。遞加至十兩而止。幼男婦女。賞銀一兩。遞加至五兩而止。仍將歸附人口。附記年貌籍貫。給文差人伴送原籍衙門交割。其守口官軍。不許擅放一人出邊。亦不許將近邊人口。假爲降人。妄希厚賞。○三十二年題准。各邊被虜人役。能傳報虜情。後果得實。給銀賞犒。若將官因而成大功。卽將原報人役爲首功。擒斬五十名。題准。授百戶。仍賞銀三百兩。一百名。題准。授千戶。仍賞銀五百兩。至一百五十名。題准。授指揮。仍賞銀一千兩。俱與世襲。凡邊禁。洪武二十二年。令守禦邊塞官軍。不得與外夷交通。如有假公事出境交通。及私市易者。全家坐罪。○弘治十三年。令各邊將官。并管軍頭目。私役軍民。及軍民私出外境。釣豹捕鹿。砍木掘鼠等項。并把

守之人。知情故縱。該管里老官旗軍吏。扶同隱蔽。若夜不收出境哨探。而與夷人交易者。除真犯死罪外。其餘俱調發煙瘴地面。民人里老爲民軍丁。充軍。官旗軍吏帶俸食糧差操。○又令大同、山西、宣府、延綏、寧夏、遼東、薊州、紫荆、密雲等處。分守守備備禦。并府州縣官員。禁約該管官旗軍民人等。不許擅將應禁林木砍伐販賣。違者問發南方煙瘴衛所充軍。若前項官員有犯軍職。俱降二級。發回原衛所都司。終身帶俸差操。文職降邊遠敍用。鎮守并副參等官。有犯指實參奏。其經過河道守把官軍。容情縱放者。究問治罪。○又令凡川、廣、雲、貴、陝西等處。但有漢人交結夷人。互相買賣借貸。誑騙引惹邊釁。及潛住苗寨。教誘爲亂。貽害地方者。俱問發邊衛永遠充軍。○十四年議准。緣邊關塞及腹裏地面。盤獲奸細。走回人口。所在鎮巡等官。務須先究來歷根因。如果干礙。接引起謀。并經該關隘守把人員。應提問者。依律問擬。應參究者。具實參奏。若有歸復鄉土。偶被邏獲者。照例起送。毋致冤抑。○又題准。北虜離邊五十里。方許駐劄。但有逼近邊牆傳箭答話者。卽係犯邊達賊。就使捕殺。不在襲殺誘殺之例。○隆慶二年題准。宣、大、遼、外兩鎮。各將領嚴禁墩軍。不許仍前傳遞貨物。與虜交通。違者拏赴軍前網打。仍從重治罪。○五年題准。北虜通貢互市。禁止宣、大、山西及陝西三邊。不許搗巢趕馬。若東虜土蠻等賊。原題不與貢市。白當相機出邊搗趕。有功。照例陞賞。但毋得輕率寡謀。翻墮賊計。○萬曆三年題准。山西、寧武、雁門一帶山場。原居流民編立保甲。分立界限。責成看守界內林木。自盜者照例問罪。縱人盜而不舉首者。一體連坐。

凡防邊功罪。成化九年。令邊軍遇賊。如曾率衆對敵及衆寡不敵者。雖失利不罪。其閉門坐視。見賊先退者。乃坐失機。○弘治六年。奏准。主將副參等官。統軍殺賊。不能料敵制勝。輕率寡謀。致有損折軍馬。失誤事機。則罪坐各官。而內臣都御史。不會與行者。各輕其罰。兵部臨時奏請定奪。若各該分守守備等官。不行設備。被賊入境。搶擄人畜。或生事貪功。損折軍馬。卽係鎮巡總兵官。平昔威令不行所致。當均受其罰。若互相隱匿。不行實報。許巡按御史。科道官。并兵部訪實奏劾。治以重罪。○十三年。令凡失誤軍機。除有正條者。議擬監候奏請外。若賊擁大衆入寇。官軍卒遇交鋒。損傷被虜數十人之上。不會虧折大衆。或被賊衆入境。虜殺軍民數十人之上。不會虜去大衆。或被賊白晝。夤夜突入境內。搶掠頭畜衣糧數多。不會殺虜軍民者。俱問守備不設。被賊侵入境內。虜掠人民者。律發邊遠充軍。若是交鋒入境。損傷虜殺四五人。搶去頭畜衣糧不多者。亦問前罪。數內情輕律重。有礙發落者。仍備由奏請處置。其有被虜入境。將爪探夜不收。及飛報聲息等項。公差官軍人等。一時殺傷捉去。事出不測者。俱問不應杖罪還職。如境外被賊殺虜。爪探夜不收。非智力所能防範者。免其問罪。○凡各邊及腹裏地方。遇賊入境。若是殺虜男婦十名口以上。牲畜三十頭隻以上。不行開報者。軍民職官。問罪降一級。加前數一倍者。降二級。加二倍者。降三級。甚者罷職。其上司。及總兵等官。知情扶同事發。參究治罪。○正德十三年。奏准。凡擬守邊將帥。賊寇入境。虜掠人民。邊遠充軍。罪者必彼此衆寡相當。堪以出戰。故不設備。閉門不出。方依律坐之。若虜衆兵

寡。止可固守。不可輕出者。勘實奏請。若止是搶掠牲畜。殺虜沿邊哨探。及採打柴草軍民。不係境內人民者。俱有應得罪名。不許引用前律。其輕率寡謀。軍無紀律。以致損折官軍者。律無正條。比律奏請定奪。若奮勇迎敵。殺敗虜賊。雖斬級數少。官軍陣亡數多。仍須論功陞賞。不許妄引損軍律例治罪。○嘉靖八年議准。今後凡遇聲息。各該參隨人等。不許指稱按伏爲名。若是本官親臨行陣。方許參隨跟隨上陣有功。照常造報陞賞。若有冒奪情弊。并本官一體參究治罪。○十六年奏准。今後行勘各邊失事官軍。若係百五十名以上。方問守備不設。百五十名以下。照常問擬罰治。中間若有按伏出哨。適當境內。畏怯逗留不行。與坐堡等官軍。併力截殺。以致虜殺軍民頭畜等項數多者。亦問守備不設軍罪。若守備以下官員。果能督軍奮勇。與賊交鋒。中間若有衆寡不敵。以致損失官軍十餘名者。雖問前罪。亦要明白聲說。奏請末減。若是閉門不出。及逗遛閃躲。不曾與賊交鋒。以致虜殺數多者。查勘明白。問擬守備不設軍罪。不必奏請末減。若虜賊大舉。失事重大者。止許參問總兵。副參。遊擊等官。通行各邊撫按衙門。著爲定例。○十八年議准。今後達賊侵犯。除本鎮官軍。照例行巡按御史查勘外。其鄰鎮官軍。亦要通查某鎮應援及期。某鎮應援失誤。某營客兵。在分某處。曾否戰守。有無失事。一併查明參奏。○二十六年題准。將官緣事。提問聽勘。原問衙門。先具由。達兵部知會。仍作速結正。毋致淹延。○又題准。宣大三關邊牆可守。今後虜如潰墻。平時則各路。各城堡參守官。防秋。則各領兵列營守墻等官。各查信地。坐以守備不設。爲賊所淹襲。因

而失陷城寨正律。其遇賊退避觀望逗留。不卽應援。以致失誤軍機。不分主客。一體坐以臨陣退縮。及領兵官已承調遣。不依期進兵策應律。不許仍援守備不設。未減充軍罪名。○三十一年題准。大同延綏寧夏甘肅宣府遼東各路將領。今後但遇虜賊近邊。卽便相機設策。或打其帳房。或殺其老小。或奪其馬匹。或勦其畸零。凡有壯夫居民敢勇殺賊。俱照新例。從重陞賞。趕來馬匹多者。官收四分。本人六分。少者通給本人。至於參官臨陣有所損失。聽從寬免。仍行各邊巡按。凡有報功驗係真正賊首。卽與造冊奏繳。本部覆題。不許再四駁查。致懈鬪志。○又題准。保甲陞賞。每鄉舉殷實有力。人所信服者一人。立爲頭領倡率。有能把截山口。或固守城堡。保全地方。爲首者。賞銀一百兩。授職一級。仍與冠帶。爲從者。各量加賞。官吏於本等資格上加陞。生員增附。卽與補廩。廩膳。送監肄業。義民陰陽醫官。各授七品散官。獲有首級。照官軍例陞賞。所得牛馬等項。盡給充賞。地方軍民。不聽約束。戮力防禦。不入城堡收斂者。從重罰治。或追殺。以充軍需。軍衛有司官。能保障地方者。撫按官類奏陞擢。若不防禦收斂。致賊搶殺人畜者。比照邊官事例問罪。○又題准。遼東軍職。犯該失機等項。除眞犯死罪外。如該充軍爲民。而年力未衰。慣經戰陣。及情犯可原者。從重罰贖。奏請還職起用。○三十三年題准。賊入內地。陞賞與邊方不同。而衝鋒破敵。奮勇當先。雖無擒斬。定爲頭功。查照邊腹事例。一體世襲。○又題准。薊鎮參遊等官。防守三年無失。聽類薦陞擢。○三十四年議准。薊州門戶。必由宣府。獨石大山墩等處。獨石參將。能精選夜不收。哨報明的。照

軍功陞賞。夜不收陞一級賞銀二十兩。如誤機宜。參將從重治罪。夜不收以軍法從事。○四十三年題准。各處大小將領官軍。果能搗巢邀擊。獲有奇功。不次陞擢。斬有首級。照例陞賞。如果深入虜營。衝鋒陷陣。致有損傷。不坐將領之罪。止出格優恤。死事之人。以示激勸。○又題准。遼東武職官犯賊。干礙行止。與零賊出入。不行進兵。及重罪減等者。照舊編發別鎮。其虜勢重大。衆寡不敵。情罪可原者。定發本處極邊衛所。其已經編審而久延在家者。嚴限發遣。○隆慶元年題准。今後各邊總督鎮巡。遇有功罪。自總督以至副參遊守兵備有司。凡有兵馬城池之責者。俱查照職任。一體酌量論賞行罰。○又題准。遼鎮各村居人。就近築堡收斂。虜至。能捍拒保全者。堡長准給冠帶。○三年題准。薊昌三鎮。務要因墻拒守。以守爲戰。果能保無他虞。照斬首事例。題請陞級世襲。○萬曆三年題准。宣、大、山西、延寧、甘、固等處。凡已議通貢者。自有三年一次論功陞賞。不許援考滿事例。冒請希恩。

凡海禁。弘治十三年。令官民人等。擅造二桅以上。遠式大船。將帶違禁貨物。下海入番國買賣。潛通海賊。同謀結聚。及爲嚮導。劫掠良民者。正犯處以極刑。全家發邊衛充軍。若止將大船雇與下海之人。分取番貨。及雖不曾造有大船。而糾通下海之人。接買番貨。或探聽番貨到來。私買販賣。若蘇木、胡椒。至一千斤以上者。俱問發邊衛充軍。番貨入官。若小民撐使小船。於海邊近處。捕取魚蝦。採打柴木者。巡捕官兵。不許擾害。○嘉靖四年題准。嚴督兵備。倭等官。將沿海軍民私造雙桅大船。盡行拆卸。如有仍前撐駕者。

即便擒拏。檢有松杉板木枝圓藤錠等物。計其貫數。并硫黃五十斤以上。俱比照收買販賣蘇木胡椒至一千斤以上。不分首從。并將接買牙行及寄頓之人。俱問發邊衛充軍。船貨入官。其把守之人。并該管里老官旗通同故縱。及知情不舉者。亦比照軍民人等。私出外境釣豹捕鹿等項。故縱隱蔽例。俱發煙瘴地面。民人里老爲民軍丁充軍。官旗軍吏帶俸食糧差操。仍給榜文通行浙福二省海道地方。常川張掛曉諭禁約。○三十三年題准。南直隸浙福廣東等處。有將雙桅三桅大船下海。及沿海居民。遇夷船乘風飄泊。私送水米者。俱坐通番重罪。○又題准。近海豪民。交通倭寇。今後巡鹽御史兼管巡海。以便禁戢。○隆慶三年題准。近海地方。凡有寇賊處所。私將硝黃與賊交易者。正犯凌遲全家處死。兩鄰知而不舉。發遣充軍。告首得實。從厚賞賚。若係官司收買。亦照明開數目。赴撫按衙門掛號。但有多帶一體治罪。○四年題准。申明以後。文武官員。但有養寇殃民。臨陣退縮。賣港縱賊。受賄招撫。及將軍器火藥酒米下海通賊接濟者。俱照律例。從重問擬。中間有贓跡顯著。及積年通賊者。仍照近例。凌遲梟示。籍沒家財。以充軍餉。凡防海功罪。嘉靖三十三年題准。各兵備海防副參守備有司軍衛等官。凡有被倭殘毀市鎮。隱蔽不報。坐視不救者。巡按指實參究。一體以失事論罪。○隆慶二年題准。海洋有警。水兵果能奮勇邀擊。卽論水兵之功。若賊近內港。陸兵果能據險堵截。不致登岸。卽論陸兵之功。撫按據實具奏。俱照平倭事例。陞賞。若水兵哨備不嚴。致賊突入內港。陸兵堵截不力。致賊登岸。流突水陸將領。俱以守備不設治罪。若賊在

內港陸兵竭力抵敵。未得登岸。水兵退縮不前。則論陸兵之功。而究水兵之罪。水兵能從海洋追逐入港。使賊腹背受敵。水陸官兵各有擒斬者。不惟照例陞賞。水兵將領仍宥守備不設之罪。賊雖登岸焚掠。陸兵能奮勇驅勦。擒斬數多。賊勢窮蹙。捨舟入海。水兵能迎港奮勇擒斬盡絕者。水陸官兵守備不設之罪。通行免究。

凡邊海軍人犯罪。弘治十三年。令各邊關堡墩臺等項。守備去處。若軍官用財買閒者。官員問罪。調極邊衛分守禦。旗軍人等。發沿邊枷號一箇月。常川守哨。若原在關營官軍。逃回原籍潛住。及架砲夜不收。守墩軍人。晝夜回家輪班不去者。俱照前項調衛。枷號守哨發落。○又令。凡各處備倭貼守軍人。代替者。正軍。問調沿海衛分。舍餘人等。就收該衛充軍。把總等官縱容者。參問治罪。○又令。沿邊沿海旗軍舍餘犯。該監守常人。盜竊。盜掏。摸搶奪至徒軍以上者。俱送總兵官處查撥缺人墩臺。守哨滿日疎放。其別項徒罪以上者。有力納米等項。無力巡哨。○正德十六年。奏准。沿邊地方軍民人等有躲避差役。入夷寨潛住者。民發邊衛軍舍發極邊煙瘴地方各永遠充軍。本管里長總小旗。及兩鄰知而不首者。各治以罪。有能擒拏送官者。不問漢土軍民。量加給賞。

明會典卷之一百三十三 兵部十六

【鎮戍八】

【圖本】

天下險隘要衝在職方皆有圖本。今不能盡載。而邊事特重。故載鎮戍總圖一。九邊圖九。其沿海及腹裏地方。夷蠻獠獍之屬。所宜備禦者。咸著于總圖焉。


洪武二十六年定。凡天下要衝及險阻去處。各畫圖本。并軍人版籍。須令所司成造送部。務知險易。

造圖冊地方

陝西、寧夏、甘肅、四川、貴州、兩廣、雲南、湖廣、河南、遼東、大同、宣府、山西、山東、延綏等處、松潘等處、鄖陽等處、鳳陽等處、蘇、松等處、雁門等處、紫荆等關、薊州等處、順天等府、腹裏城池各都司總送。

成化元年。令圖本、戶口文冊俱限三年一次造報。○弘治元年。令圖本及官軍、戶口、馬騾文冊。限期在京并北直隸衛所、大寧、萬全二都司限二月終。南京并南直隸、中都、河南、浙江、江西、山東、遼東、山西等都司。限三月終。陝西、福建、湖廣限四月終。其圖本自各邊沿海以至腹裏都司一體造報。○嘉靖十年。奏准各該都司衛所官軍馬騾文冊。今後每十年造送一次。止造總數。不必細開。仍移咨南京兵部一體查造施。

大濱南峪嘉至西鮮朝起東 圖總皮鎮





西至宣府邊止長一千餘里



起岸海東自東界邊鎮本 圖邊東遼






起鎮花黃州蕪自東界邊鎮本 圖邊州蕪




寬堡河陽西鎮府宜自東界邊鎮本 圖邊同大




溝起西至山四鎮丫角止沿長六百四十四餘里




西起山角丫同大自東界邊鎮本 圖邊西山




起灣牛老邊西山自東界邊鎮本 圖邊綏延




西至寧夏鎮邊止長一千五百餘里





至四起邊鎮綏延自東界邊鎮本 圖邊夏鄂






固原邊圖 本鎮邊界自寧夏鎮邊起





甘肅邊圖 本鎮邊界東自固原鎮邊起





明會典卷之一百三十四 兵部十七

【營操】

國初設京營隸大元帥府。後改五軍都督府。以訓練在京官軍。永樂間遷都。又於中都、大寧、山東、河南附近衛所。摘撥官軍。輪班上操。以內衛京師。外備征伐。名曰三大營。景泰三年。分爲十營。成化三年。分爲十二團營。正德六年。更爲東西兩官廳。嘉靖二十九年。復三營制。名曰京營。其建置沿革并事例。備開於後。禁衛諸營亦以類附見。

【京營】

舊三大營制

永樂中定

國初立大小教場。以練五軍將士。永樂初。既有五軍營。又有三千營。以司寶纛令旗。神機營以司神鎗火器。名曰三大營。管操官曰提督。各哨分管官曰坐營。曰坐司。俱兵部奏請於公、侯、伯、都督。都指揮內推選。後兼用內臣。神機火器特令監之。曰監鎗。又有掌號、把總、把司、把牌等官。俱於都指揮、指揮內推選。

五軍營提督內臣一員。武臣二員。掌號頭官二員。

大營坐營官一員。把總二員。

中軍坐營官一員。馬步隊把總各二員。

左掖。

右掖。

左哨。

右哨官俱同。

管操練京衛及中都留守司、山東、河南、大寧三都司各衛、輪班馬步官軍、千二營把總二員。

管隨駕擺列馬隊官軍。

圍子手坐營官一員。一司、二司、三司、四司各把總二員。

管操練上直叉刀手及京衛步隊官軍。

幼官舍人營坐營官一員。幼官營把總一員。

舍人營一司、二司、三司、四司各把總一員。

管操練京衛幼官及應襲舍人。

殫忠効義營坐營官一員。把總各一員。

管操練京衛報効舍人餘丁舍人營曰殫忠餘丁營曰効義

三千營提督內臣二員武臣二員掌號頭官二員坐司官五員見操把總三十四員上直把總十六員明甲把總四員

一司

管執大駕龍旗寶纛勇字旗負御寶及兵仗局什物等件上直官軍

一司

管左右二十隊勇字旗大駕旗纛金鼓等件上直官軍

一司

管傳令營令旗令牌御用監盔甲尙冠尙衣尙履什物等件上直官軍

一司

管執大駕勇字旗五軍紅盔貼直官軍上直官軍

一司

管殺虎手馬轎及前哨馬營上直明甲官軍隨侍營隨侍東宮官舍遼東備禦回還官軍

神機營提督內臣二員武臣二員掌號頭官二員

中軍坐營內臣一員。武臣一員。其下分爲四司。各監鎗內臣一員。把司官一員。把牌官二員。左掖坐營內臣一員。武臣一員。其下分爲三司。各監鎗內臣一員。把司官一員。把牌官二員。右掖坐營內臣一員。武臣一員。其下分爲三司。各監鎗內臣一員。把司官一員。把牌官二員。左哨坐營內臣一員。武臣一員。其下分爲三司。各監鎗內臣一員。把司官一員。把牌官二員。右哨坐營內臣一員。武臣一員。其下分爲三司。各監鎗內臣一員。把司官一員。把牌官二員。管操演神銃神砲等項火器。

五千下坐營內臣一員。武臣一員。其下分爲四司。各把司官二員。

管操演火器及隨駕護衛馬隊官軍。

舊團營制

景泰初定

景泰初。選大營精銳官軍。分立十營團操。以備警急。調用名曰團營。每營官軍一萬員名。其提督及坐營掌號把總等。內外官員。做三大營之制。而命本部尙書或都御史一員提督。天順初罷。八年復置。成化初罷。三年復置。分爲十二營。十八年以邊警。令定撥官軍聽候調用。自後又於團營選其精銳爲聽征人馬。屬之東西兩官廳。

掌號官三員

奮武營坐營內臣一員武臣一員號頭一員

把總二十員所隸錦衣衛和陽衛燕山右衛府軍右衛虎

耀武營所隸燕山左衛前衛武德衛義勇右衛忠義後衛

練武營所隸金吾右衛右衛留

顯武營所隸府軍左衛羽林左衛右衛武功左衛虎賁左衛潘陽左衛右衛驍騎右衛神策衛興武衛龍驤衛

敢勇營所隸羽林前衛留守中衛忠義右衛神武中衛

果勇營所隸旗手衛濟陽衛武功中衛留守後衛忠義前衛

効勇營所隸水清右衛義勇前衛神武左衛

鼓勇營所隸彭城衛金吾前衛後衛豹韜衛神武後衛

立威營所隸永清左衛府軍後衛龍虎衛大寧中衛義勇後衛

仲威營所隸金吾左衛濟州衛留守前衛鎮南衛寬河衛

揚威營所隸武功右衛衛府軍前衛

振威營所隸通州衛大興左衛留守左衛富哈衛會州衛以上皆嘉靖初派送

十二營內各分五軍三千神機三營五軍營管內外馬步官軍三千營管內外馬隊官軍神機營

內外步隊官軍

今定京營制嘉靖間定

嘉靖二十九年罷團營兩官廳復祖制三營更三千營曰神樞營其三營司哨掖等名及諸內臣俱裁革而統以大將一員曰總督京營戎政廳給印曰戎政之印佐以文臣一員曰協理京營戎政其下設副參等官二十六員凡團營兩官廳之兵悉歸五軍營而寶蘇令旗等項則仍隸神樞營遇用撥取無恆名已又命以新募兵四萬人分隸神樞神機二營其副將各止設一員而增能戰之將六員分領操練大將所統三營之兵平日名練勇將用時各定職名

五軍營

大將一人

總主三營六副將并參將等官俱聽節制

副將二人左右前後參將四人遊擊將軍四人
大將統軍一萬二

副各七千四參各六千四遊各三千外備兵六萬六千六百六十名

神樞營

即舊三千營

副將二人各統軍六千佐擊將軍六人各兵三千
即前大將統八千外備兵四萬人

神機營將兵同

續定三大營將領官軍之制

三大營將領、副參遊、佐、坐營、號頭、中軍、千把總等官、共五百八十六員。

五軍營官一百九十六員。

戰兵一營左副將一員。

戰兵二營練勇參將一員。

車兵三營參將一員。

車兵四營遊擊將軍一員。

城守五營佐擊將軍一員。

戰兵六營右副將一員。

戰兵七營練勇參將一員。

車兵八營參將一員。

車兵九營遊擊將軍一員。

城守十營佐擊將軍一員。

備兵坐營官一員。專爲收新補之兵以備十營兵之缺者。

大號頭官一員。以上部推。

監鎗號頭官一員。

中軍官十一員。

隨征千總官四員。設在東西將臺下。

隨營千總官二十員。

選鋒把總官八員。舊爲家丁千總二員。惟戰兵營車兵營各一員。

把總一百三十八員。以上俱營推。

山東領班都司二員。

神樞營官二百八員。

戰兵一營左副將一員。

戰兵二營練勇參將一員。

車兵三營參將一員。

車兵四營遊擊將軍一員。

城守五營佐擊將軍一員。

戰兵六營右副將一員。

車兵七營練勇參將一員。

執事八營參將一員。

城守九營佐擊將軍一員。

城守十營佐擊將軍一員。

備兵坐營官一員。

大號頭官一員。以上部推。

監鎗號頭官一員。

中軍官十一員。

千總官二十員。

選鋒把總官六員。舊爲家丁千總二員。

把總一百五十七員。以上俱營推。

河南領班都司一員。

神機營官一百八十二員。

戰兵一營左副將一員。

戰兵二營練勇參將一員

車兵三營遊擊將軍一員

車兵四營佐擊將軍一員

城守五營佐擊將軍一員

戰兵六營右副將一員

車兵七營練勇參將一員

城守八營佐擊將軍一員

城守九營佐擊將軍一員

城守十營佐擊將軍一員

備兵坐營官一員

大號頭官一員

以上部推

監鎗號頭官一員

中軍官十一員

千總官二十員

選鋒把總官六員

把總一百二十八員以上俱營推

中都領班署副留守四員舊都司二員

在京各衛分隸三大營制

府軍前衛

牧馬所

騰驤左衛

騰驤右衛

茂陵衛

獻陵衛

龍虎衛

蕃牧所

通州左衛

留守中衛

大寧中衛

永陵衛

留守右衛

永清左衛

神武中衛

景陵衛

羽林前衛

通州右衛

忠義前衛

龍驤衛

奠靖所

康陵衛

神策衛

瀋陽左衛

瀋陽右衛

義勇前衛以上衛分練五軍營

大寧前衛

富峪衛

義勇右衛

燕山左衛

羽林左衛

錦衣衛

營州前屯衛

濟陽衛

羽林右衛

大興左衛

武功中衛

虎賁左衛

武功右衛

旗手衛

密雲中屯衛

裕陵衛

神武左衛

武驤右衛

留守後衛

虎賁右衛

府軍後衛

驍騎右衛

豹韜衛

彭城衛

燕山右衛

通州衛

武驤左衛

以上衛分
隸神樞營

金吾左衛

應天衛

永清左衛

和陽衛

府軍右衛

義勇右衛

留守前衛

濟州衛

金吾右衛

鎮南衛

寬河衛

鷹揚衛

忠義後衛

燕山前衛

金吾前衛

府軍衛

府軍左衛

武德衛

定邊衛

蔚州左衛

興武衛

金吾後衛

會州衛

武成中衛

忠義右衛以上衛分
隸神機營

營政通例

凡督理戎政等官。景泰初年。選精兵團練。以兵部尚書或都御史領之。弘治元年。以都御史提督。領勅行事。後以兵部尚書兼提督。○嘉靖六年。題准。特設都御史一員。專一提督團營軍務。領勅行事。○二十九年。令革十二團營兩官廳。賜名戎政廳。仍用印信關防。設京營總兵官提督三營一員。用協同提督官二員。贊理軍務文臣一員。舊任提督官回府管事。內侍官俱裁革。以兵部侍郎兼僉都御史贊理京營軍務。領勅行事。○又令總督官名。總督京營戎政。不得名總兵。改贊理。爲協理戎政。○三十一年。令總督非外出。不用欽差二字。革戎政廳首領官六房掾史。○隆慶四年。議更營制。初革總督勳臣。用總兵官三員。各給關防。推文職大臣一員督理。又改總兵官爲提督。仍用勳臣三員。又添文臣二員。與勳臣一同提督。又以六提督事權不一。仍復舊制。用武臣一員總督。文臣一員協理。給戎政印。繳三關防。○又題准。神樞神機營各添設副將一員。五軍營革參將一員。神樞神機營各革佐擊一員。凡勳臣隨營。嘉靖二十六年。奏准。行令巡視京營科道。通將公侯伯及都督等官。嚴加考覈。參舉。以憑從公推用。○三十一年。奏准。公侯伯年二十以上者。不拘見任帶俸。俱送本部酌量選用。定以協贊名色。分

撥各營副參遊佐等官協同人營觀操如遇將官調往宣大薊州等處亦卽隨營前去察知地里夷情諳習戰陣許帶家丁十名仍與口糧馬匹料草官與廩給○四十二年議准在京五府新襲公侯伯未經管事年三十五以下及各爵應襲不拘年齒長幼俱送京營聽戎政文武大臣定以日期隨營較射仍授武經百將傳等書令其熟讀細講每人仍撥軍伴十名跟用先將收管姓名具奏每歲終巡視京營科道列其勤惰勇怯奏聞○四十三年題准京營科道會同戎政大臣將隨營勳戚每歲較試二次其弓矢策論習熟者附記在簿遇有營中參遊坐營缺照例酌量推補未諳練者行戎政大臣督責戒飭○隆慶三年議准戎政大臣及巡視科道每年終將帶俸送營觀操公侯伯從公保舉以備坐營遊擊之選三年酌量絀遷一切禮體悉照營中舊規不許驕抗紊亂及剝軍占役○萬曆元年議准皇親應襲不必隨營操練凡操練洪武六年定教練軍士律騎卒必善馳射及鎗刀步兵必善弓弩及鎗凡射十二箭內六箭遠可到近可中者爲試中遠可到將士以一百六十步軍士以一百二十步近可中以五十步凡射弩每用十二箭內五箭遠可到蹶張以八十步划車以六十步凡用鎗以進退習熟爲試中凡在京衛所每一衛以五千人爲則內取一千人令所管指揮千百戶總小旗領赴御前試驗餘以次輪班在外都司衛所每衛五千內取一千人令千百戶總小旗領赴京師一體驗試餘以次輪班其所試軍士如騎卒騎射便熟善鎗刀步軍善弓弩及鎗者所管指揮千百戶總小旗各以其能受賞不中者降罰軍士中者受賞不中者

亦給錢六百元爲道里費。指揮所管軍士一千人內，三百人至四百人不中者，住俸四箇月，四百人至五百人不中者，住俸半年，五百人至六百人，不中者，住俸十箇月，六百人至七百人，不中者，住俸一年，七百人以上不中者，指揮使降同知，同知降僉事，僉事降千戶，千戶所管軍士一千人內，二百人至四百人不中者，住俸半年，四百人至六百人，不中者，住俸一年，六百人以上不中者，降百戶，百戶所管軍士一百人內，二十人至四十人不中者，住俸半年，四十人至六十人不中者，住俸一年，六十人以上不中者，降充總旗，總旗所管五十人內，二十五人以上不中，小旗所管十人內，五人以上不中者，皆降爲軍。在京衛所，發廣西、南寧、柳州守禦，在外衛所，北方者，發極南煙瘴地方，南方者，發迤北極邊衛分守禦，各都指揮使司所試軍士，四分以上不中者，住俸一年，六分以上不中者，都指揮罷職。○十六年，令天下衛所善射者，十選其一，於冬月農隙輪班赴京較試，不中者，罰其指揮千百戶，中者，賞鈔五錠，連中者，六錠，中不及者，三錠，不中者，亦給道里費。各邊軍士，就於本衛較射。○成化元年，令大營提督官，每月二次赴團營會操，每年二月十五日上操，五月十五日止，八月十五日上操，十一月十五日止，歇操之日，仍十日一赴教場點視。○弘治十七年，定團營操法，每五日之內，二日走陣，三日演習武藝。○正德八年，奏准提督各營坐營，并號頭等官，於常操之後，俱令在營操練。○嘉靖六年，奏准該操之時，提督官照常大操三日，坐營官小操二日，凡下營布陣，不必拘泥古法，止照常用三疊陣及四門方營，其武藝勿止以弓箭爲長技，每營選

箭手、刀手、鎗手、牌手、銃手各一二人爲教師，使轉相教習，長短相衛，其號令坐營官督各管事官與衆軍士逐一講解，使各通曉，毋徒隨衆呼喊，虛應故事。○十三年奏准，號頭千把總等官督教一年之上，戎政大臣會同兵部堂上官試驗，教成八分者會薦陞賞，六分以下者奏請罰治。○二十九年題准，兵仗局將一應神器，每件書營司隊伍姓名，如遇上操，就令各軍神鎗等手徑赴該局照名給領，仍給火藥馬子鉛彈，赴營從實射打，住操之日送局交收，如有炸破不堪者，告明看驗交繳，另鑄給用。○又議准，神樞神機二營餘下將官十員，所統兵馬不足一枝之數，行總協大臣會同巡視科道將五軍營備兵再行揀選，交與二營將官十員，每員領三千名，與先次選定將官二十員共兵三十枝，用心操練，精勇者作爲先鋒。○四十二年議准，通州新舊遊兵二枝併入京營操練，見在四千三百六十餘名，內止練三千名，設中軍官一員，千總官二員，把總官十二員，分爲十二司，每司軍二百五十名，仍付佐擊管束，其餘悉歸備兵營。併今

入。○四十三年議准，總協大臣每月以初一、初八、十五、二十三、日合操，其餘二十六日各營將官分練各兵，總協大臣及巡視科道不必同在一處，隨意各人一營，較閱賞罰。○又議准，戰兵、車兵、二營火器、春秋兩防、行工部發出，責令軍士常用演放，遇晚收於德勝安定二門庫內，畢日送還該局。○又議准，京營家丁、俱令歸營操演，仍擇其堪爲選鋒者，方許給月糧二石，脆弱者漸汰一二。○隆慶元年議准，三大營內、弓、箭、鎗、刀、火器等藝，各擇精熟者立爲教師，上等每月加糧六斗，次等者每月加糧三斗，教成全隊給冠

帶充名色把總。一半者給賞銀牌花紅十數名者。姑准附過。全無教練者。重責革去教師名糧。把總領二百五十人。千總領五百人。教練有成。卽當優薦聽補。中軍號頭員缺。十分之五。從厚犒賞。十分之三。亦准附過。全無教練。卽行住俸。各營將領。但有全營教練者。加以都督僉事。若副將。加以都督同知。若止教一半者。從厚獎賞。三分之一者。照常供職。十分之二者。重加罰治。全無教練者。降祖職一級。革任回衛。三年之內。三營補練。著有成效。兵部議請將總協大臣。請勅獎諭。仍加恩錄。如無功績。巡視科道參論。兵部酌量教練分數。并議黜罰。○又議准。三營各將家丁。挑選六枝。住戎政府傍。聽六副將統領訓練。修理戎政。應東西二空宅。爲總協大臣官署。常川居住。以便諸將就近稟承。○萬曆十三年。題准。春秋停操。月分。舊例分爲四班進點。今後歇操之月。間日止用二營進點。不得仍前分爲四班。往返奔馳。徒滋勞憊。凡輪操。宣德元年。調河南。山東。大寧。都司。中都。留守司。直隸。淮陽等衛。及宣府軍士。至京操備。令每歲輪班往來。原額。春秋兩班。官軍一十六萬員名。中都四萬一千九百六十員名。河南一萬四千六百四十九員名。山東三萬二千六百一員名。大寧七萬七百九十員名。○正統十四年。令外衛輪班京操者。前班三月還。八月到。後班八月還。次年三月到。河南。山東。北直隸強壯官軍。皆隸前班。○成化十二年。令輪操官軍。有違限一箇月之上者。參問。其撥補逃故等項。違兩箇月之上者。解人連坐。若軍士一班不到者。罰班六箇月。軍兩班。官一班不到者。發居庸。密雲。山海關。罰班六箇月。軍三班。官兩班不到者。發大同。宣府邊

衛罰班一年。官三班不到者。發邊衛。罰班一年半。其補班月日各另扣算。俱先送法司問罪。畢日免其納鈔杖斷。送回兵部發遣。自首者止問越關等罪。照例補操。罰班免發邊衛。若見操在逃。一次至三次。應罰操者。比前例遞減一等。前項自首及該班不到。并承批管解捏故軍職。俱不必參奏。徑自送問。○弘治元年。令都司衛所除軍政守城管操管運外。餘分兩班輪操。五年一代。週而復始。○十一年題准。官軍依期數足。聽兵部行巡撫衙門將掌印官量加獎勵。若違限及少軍。查例行巡按御史提問。仍監追軍完解部。獲有批廻。方許復職。○十三年奏准。輪操官軍逃在京城內外潛住者。初犯打七十。再犯打一百。送操官旗無力納鈔者。就在原問衙門單衣決打。若逃回原衛原籍者。以越關論。逃三次者。不分革前革後。各免決打納鈔。京衛調外衛。外衛調邊衛。俱帶俸食糧差操。○又令該操官員故行搆訟。不肯赴操者。聽撫按官起解赴部發操。如有抗拒或挾私排陷者。調邊衛帶俸。其輪操軍士沿途劫財殺傷人命。占奪車船。作踐田禾等項。除真犯死罪外。徒罪以上。發邊衛充軍。其管操官不行鈴束。并故縱者。參問調衛。○正德六年。奏准各處地方災傷六分以上者。京操官軍先行放回。五分以下者。仍舊存操。○嘉靖四年議准。官軍上班有兵備去處。責成兵備無兵備去處。責成該道分巡。親臨督併起程。其月糧徵完。布政司佐貳官一員帶赴總會便道。都司佐貳官一員帶軍册候官軍到彼。唱名給散。○十年議准。今後脫班不到官軍。俱自起程之日爲始。扣除俸糧還官。不許朦朧冒支。○十七年議准。各處該班官軍。若全衛通不赴操。及不

到七分以上者。將親管指揮千百戶官。鎖押送營比較。其脫班官軍。查照脫班次數送問。完日照依轉發關邊。罰班操守。○二十一年題准。少軍衛所官員。以十分爲率。不到二分以上。行撫按官提問。住俸五分。以上將掌印官提解來京究治。八分以上。提問降級。調發邊衛。領班都司亦以十分爲率。八分不完。參奏降用。其不到官軍。自文書到日。限一箇月。以裏驗補解營。違者巡按御史先將各兵備守巡查。參其各該坐營等官私役賣放。兵部及提督科道訪實參奏。○二十三年議准。各該衛所領班官員。五百名之上。以指揮領之。一百名之上。千戶領之。不及百名。總小旗領之。○二十九年題准。凡班軍臨解之時。不行拘集齊足。唱名交付者。卽係各衛所掌印官故縱。各該守巡等官督責欠嚴。若照數唱名。交付領班劄付官。都司管領起程。而復不到營者。卽係劄付官領班都司賣放。在京聽巡視京營科道舉劾參送法司。在外聽巡按御史參奏提問。照少軍分數問擬。○三十年議准。大寧都司兩班官軍六萬餘名。免其京操。添設將官一十二員。統領前去薊鎮防禦。○三十一年議准。山東河南各添註僉事一員。專理班務。南直隸卽以顯上僉事兼管。各請勅行事。其僉事會同都司掌印官精選班軍。點付領班都司押領赴京。缺少違悞。聽兵部撫按及巡視科道參劾。僉事免其赴京。○三十五年議准。鳳陽山東河南不到班軍。每名追銀三兩六錢。以備募夫之用。行中都山東河南撫按官嚴行兵備都司督責各衛所掌印官。清查原額官軍。督發赴班。有逃亡事故。卽將城操軍餘及衛所雜差人役。暫行撥補。一面行清軍官著實勾補。務足原額。應支

月糧及時支給。預支糧銀。隨軍起解。以後少軍衛所掌印官。三分以上。問罪住俸。五分以上。問罪降一級。八分以上。問罪降一級。調發別衛都司掌印官。五分以上。參問住俸。八分以上。一體降級。皆以實在軍數爲主。逃亡者不在數內。如果照數點發齊足。中途不到者。領班都司。并劄付官。亦照前都司衛所掌印官例行。如有受財賣放。賊多罪重者。仍照律例問擬。俱聽戎政衙門參行兵部。提解來京究問。○四十一年議准。今後每軍止許存留安家米兩箇月。其餘盡數差官解部。委司官督同領班都司給散。○又議准。班軍赴京。照例赴部點名。隨發各營收操。下班之日。亦聽部點放。各營將官。不許擅自收放。差撥役占。凡行糧文冊。俱令該管都司攢造送營。給赴戶部關支。內有逃故。查明扣除。○四十四年議准。將班軍點完。劄付解官。同赴撫按衙門掛號。卽行。不到官軍。照例問擬。追銀解部。班滿掣有營批。兵部方給批廻。○隆慶元年題准。發河南、山東班軍一萬二千名於薊鎮防守修邊。○二年議准。三都司京操官軍。督令隨營操練。仍咨工部。并內官監。今後遇有重大工程。必須會同兵部。并戎政衙門議請。酌量撥給。不得徑議撥用。○又議准。上班官軍。責令各兵備與都司掌印官。拘各軍正身。審係精壯。將真正年貌。明白填註。造册四本。五人爲伍。設一伍長。五十人爲隊。設一隊長。互相覺察。內有年貌不對。及一人不到者。同伍及隊長。俱以軍法連坐。○萬曆元年議准。凡班軍缺額。領班都司。催取名糧。與劄付官管領。隨軍解部。每糧一分。卽准軍一名。迪論分數。以行參劄。其缺軍分數。在衛所原少。則照例參究。該都司衛所掌印官。及守巡兵備。

若在途在京脫逃。則專參各劄付官。及領班都司。若有司徵解錢糧不前。以致班銀拖欠。聽撫按參奏處治。○又題准。改山東河南領班官。爲署都指揮僉事。中都領班官。爲署副留守。與各司軍政僉書一體管事。每遇該班內輪一員。領軍赴京操備。回日嚴督各衛所掌印官。清查軍伍。○又議准。山東濟東兗三府境內衛所官軍。邊操旣屬秋班。京操俱併春班。青登萊三府境內衛所官軍。邊操旣屬春班。京操俱併秋班。二十四衛共省劄付官二十四員。又革去押解官二十四員。裁革都司僉書一員。京操劄付官與在衛巡捕官相輪。邊操千把總與在衛管操官相輪。以均勞逸。○八年題准。班軍免其做工。俱令著伍操練。工部將人匠班價等項。著實清查整理。以濟工作之費。免致復用班軍。○九年題准。訓練班軍。山東春秋兩班。分爲四營。領班都司二員。河南秋班。仍爲一營。領班都司一員。中都春秋兩班。分爲八營。領班留守四員。每營各設中軍一員。千總二員。把總六員。上班之日。與同京營坐營官分練。聽六副將統屬。春班正月。秋班七月上。班隨京營歇操。放回休息。其僉補額軍。二分以上者紀錄。一分者免究。通無僉補者。附過軍數減於前班者。兵備留守都司等官。分別參治。

凡選補成化十九年議准。揀選在京七十七衛官軍。一等着送團營。二等着送五車等營。各操練。○弘治十八年題准。差郎中一員。會同選軍科道。弔取各衛食糧。并賞賜文冊。清查空閒旗軍。送各營操練。○嘉靖十六年議准。今後送驗軍士。務要審實正身。其年二十以上。五十以下。年力精壯者。俱送團營操備。如

二十以下五十以上精力果憊者方許驗入三大營老家各該衛所官旗敢有故縱冒名代替蒙蔽送驗者審究得實驗軍主事從重參究○又令在京七十八衛所舊七十七衛所勾解告補軍丁及在逃自首軍惟蕃牧所牧馬所該所徑收著役餘七十六衛所俱送驗軍主事審驗長陵等八衛專護陵寢騰驥等四衛專養御馬監四衛營及二十四外馬房馬匹奠靖所專守本所城垣犧牲所專養祭祀犧牲外其餘驗係精壯者俱分送十二營操練○三十年議准行戎政文武大臣會同巡視科道并兵部驗軍主事清查京營老弱軍士各帶應繼應替精壯戶丁審驗明白卽與摘牌替役○又令在京衛所逃軍在兵部職方司首補領給印信准令紙票隨赴兵部武庫司明報掛號查原衛所勾單未發立案已發行文原籍停止每月終武庫司手本過職方司查理如有首補過不報奸軍及在衛不自速行告補戶丁或係查訪得出或被入告發一體重治○三十一年議准行京營文武大臣挑選精兵四萬以二萬二千屬五軍營一萬八千屬神樞神機營○三十三年議准兵部委司官一員會同巡視科道督同副參遊佐等官審驗各營正備兵將大小衛分相兼搭配務令一衛專隸一營或多寡不齊務將一所盡屬一營精壯者作爲正兵老弱者作爲備兵以後遇有各衛告補及清解首逃軍役及營操官舍聽驗軍主事悉照編定營伍分撥號頭等官查照遵守○三十七年議准驗補新軍清勾故絕俱要細查應補正身方准行查取結各衛所不得扶同驗送如或作弊該管指揮千百戶連坐○四十二年議准劄委司官一員會同巡視科道督

率各衛掌印官備將各營正兵及原屬衛所每營每衛各攢造文冊一本營中據冊稽查衛中憑冊支餉。後有逃亡事故卽行開報在衛卽與住糧容隱者送問。○又議准召募軍士在營病故或爲事住糧者許赴兵部告明病故者以精壯親餘頂補爲事者許其出首復役。○又議准戎政大臣會同巡視科道每營挑選武藝精強者列爲一等秋操口糧增支六斗武藝生疎膂力尙堪教習者作爲二等止支口糧三斗。○四十四年議准行總協大臣將軍兵內除挽車銃射之外其餘俱選作戰兵仍於城守軍內擇精壯者共足四枝務使戰兵十枝與軍兵十枝相當。○四十五年議准京營城守十一營中量併神樞第三營之兵分入十營之內共軍戰城守三十營以遵欽定三十營之制其城守每營俱限二千名不足之數催行清軍衙門勾補官多兵少其千把總冗員行總協巡視等官選別去留。○隆慶元年議准行各巡按御史著落清軍官從實勾軍解部先補戰兵次及車兵又次及城守每營務足三千。○五年議准行總協戎政大臣查殫忠効義二營舊規將官舍餘丁從宜收補操軍。○萬曆元年議准將改昭陵及掣去守衛者各營於分屬衛所官舍軍餘內召補一體收糧入操。○八年題准三營正兵缺伍照摘牌事例選補每月一次送部覆驗收糧操練。○九年議准解到新軍卽時收伍但有舊軍應役卽係冒頂責治革退不得將新軍發回聽繼以滋奸弊。

凡考閱洪武中令京營士馬之數按月開報。○景泰三年令營操軍士有納賄買閒者御史訪察兵部委

官分行點視。赴操過限三箇月者。軍發邊衛。官降三級。終身守邊。○天順八年。差給事中。御史各一員。巡察各營。上操軍士。○成化三年。令各營官軍糧冊。每三年。兵部委官同科道官清查。凡軍士有事故者。每季委官查勘。三箇月一開報。操官在逃者。每月類參。○十九年。題准。今後給事中。御史。點開官軍。照舊明白。赴營抽隊摘點。如有不到。追究下落。干礙坐營把總等官。指實參奏。○弘治六年。奏准。兵部提督官會同該營總兵官。通將各營號頭。照依軍政事例。從公考選。年力精壯。謀勇可取者。存留管事。老病貪婪。誤事害軍者。黜退差操。另於聽缺。并隨伍官員內。推補。以後仍五年一次會考。○十一年。題准。點開京營科道官。一年一換。不許別項推委。○十七年。題准。各營號頭把總等官。有將操軍撥送權門私役。五名以上。降一級。二十名以上。降二級。若至五十名以上。降三級。仍調外衛。識字旗軍人役。改撥邊衛充軍。○正德六年。以春秋初操。二次閱視太密。奏准。每三年一次。兵部奏請舉行。○嘉靖元年。奏准。三年一次會官考驗團營官軍弓馬武藝。察其平昔賢否。分別等第。奏請去留。○四年。令點營科道。并驗軍委官。備查團營官軍。每營務足一萬之數。今後凡有興作。不許擅便奏討。坐營號頭把總等官。仍要加意撫恤。有私自影射及額外役占。俱退出原伍差操。違犯者。科道官指實參奏。從重究治。○二十八年。議准。三大營官員除三千營隨駕執事五軍營內圍子手。神機營內五千下。各係上直。其餘把總等官。五軍營三十九員。革一十二員。神機營五十六員。革一十四員。以後坐營官缺。兵部推舉。或將見在別營官員事務簡者。量爲兼

領其把總官員查照舊例。每軍二百五十名。方設一員。如遇員缺。提督文臣會同該營提督巡視科道等官選補。俱務在得人。不必拘泥原額。○二十九年題准。點視科道仍一年一換。復命之日。舉劾大小將領。仍差兵部司官分投點視。○三十一年議准。每年防秋畢日。聽京營科道將在營將領從實舉劾。兵部會同戎政大臣考察去留。○四十三年議將京營將領。每遇年終。科道復命之時。戎政大臣會同考閱一次。以定臧否。兵部官不得干預。其正當閱視之年。歲終免其重閱。○四十四年議准。三大營號頭千把總等官不職。許總協大臣不時參革。果有勉修職業者。每半年一次開具送部。某人堪任邊方。某人堪任本營。以憑酌用。巡視科道差滿之日。亦要一體保薦。○隆慶三年議准。秋操之期。戎政大臣及巡視科道將各營官軍家丁師範。如法考閱。下等者軍士照常發落。家丁師範革糧一石。隨操。甚則革除名糧。就於上等軍士挨補。以後年分。照例考閱。互相陞降。三考上等。改充管隊。五考上等。照邊方効勞年久事例。給與冠帶。○四年議准。秋操歇日。提督大臣會同巡視科道將各副將以下。至把總管隊隨伍等官。大加閱視具奏。○萬曆四年議准。該營千把總員缺。總協大臣今後查巡視科道疏薦者。酌量題請充補。未經疏薦者。不得濫用。○又議准。今後京營將領。年資果深。與才堪邊鎮者。與邊將相兼推用。或才不宜邊鎮。歷一任至六七年者。聽總協大臣查其才識卓越。操履無虧者。指實具奏。兵部題請加恩。

凡選鋒。嘉靖三十九年。令京營將官。有曾任邊方者。每員准家丁二十名。每名月給米二石。仍給犒賞銀

五兩。於太僕寺馬價。或本營子粒銀內動支。○四十五年。令家丁俱隨營操。仍擇其堪爲選鋒者。方月給米二石。○萬曆五年。題准革去家丁名色。通將各營精壯軍丁。選驗改爲選鋒。六副將各與三百名。十戰兵營。每營增設三百名。車兵十營。每營各增二百名。每月給雙糧。各統以把總時常訓練。總協科道不時簡閱。○又令添設選鋒把總。轉送該營管領操務。

凡軍伴。嘉靖四十三年。題准副將軍伴二十名。參遊佐擊坐營一十八名。大號頭十名。中軍千總五名。把總四名。俱班價內給與。不分營官大小。每軍伴一名。每月給銀四錢。○隆慶三年。題准總督跟伴不過二十四名。書算二名。副將不過二十名。參將不得過十八名。號頭不得過十名。以上各書算一名。中軍千總不得過五名。把總不得過四名。違者聽總協及巡視官參奏。多五名降一級。十名以上降三級。二十名以上罷職不敘。仍發邊衛充軍。賣放包納。悉准此例。勳臣應襲難同見任。一體裁革。近年每季於班價內題請支給。

凡聽征人馬。弘治十四年。令選團營官軍三萬員名。以將官二員管馬隊。二員管步隊。聽候調遣。○正德十一年。令舉曾經戰陣。謀勇兼著將官一員。假以副都督名目。公同提督團營大臣。挑選人馬。如法訓練。以備緩急。○又令於團營內揀選官軍一萬員名。在東官廳操練。○嘉靖六年。令以參將二員。統領新選官軍三千員名。在東官廳操練。總兵官一員。調度。○二十八年。題准行巡視京營科道會同提督聽征等官。將營軍簡選精銳強壯。以備出戰。在十二團營者。選作八陣。以四陣爲正兵。四陣爲奇兵。專備緊急防

衛京城在東西二官廳者分作十二枝。六枝出征。六枝休息。更番節力。○三十年議准。聽征軍士分爲三等。食糧有差。膂力過人。騎射精熟者爲上等。月糧外加米五斗。年力強壯。技藝通曉者爲中等。月糧外加米三斗。三等者。照常米一石。○又議准。出征在逃。臨陣退縮者。俱送刑部。查照律例問擬。應瞭哨者。編發宣府。獨石等處。沿邊瞭哨。再犯。及因而失誤軍機者。俱擬死罪。仍查一伍中逃至二人。一堡中逃至五人以上。千把總官不行檢舉。通行連坐。○三十七年題准。聽征官軍三萬五千員名。防秋三箇月。每員名行糧每月四斗五升。○又議准。三大營聽征官軍有逃故者。就於本營取補。如本營無精壯者。取之各衛餘丁。及解到新軍。不許隔營充調。以滋影射。致使錢糧馬匹。難以稽查。○三十九年議准。三大營官軍揀選精壯者。五軍營十二枝。神樞營。神機營各四枝。每枝三千員名。共六萬餘名。俱免做工。聽候調遣。每枝用中軍官一員。千總二員。把總十二員。軍有年老者。聽以精壯兒男。摘牌收伍。免行該衛取結。○四十三年議准。京營不宜遠調外出。今後有警。以車營兵十枝。分布東西便門。去城各一二里。其城之東西南北。各屯戰兵一枝。緊在關廂之外。餘下戰兵二枝。隨戎政二臣。駐適中去處。外壯車營聲勢。內助都城防守。○又題准。一等官軍一萬八千員名。照舊每月支口糧六斗。車兵三萬員名。總協巡視科道。隨征官軍一千六百員名。月支三斗。守城四萬二千一百十四員名。月支一斗。○萬曆二年議准。行總協大臣。防秋之時。將三大營戰車二兵。各調撥一枝。就令本管將官統領。赴薊鎮軍門。聽派相應處所屯駐。遇有虜變。與

邊兵併力截殺。事竣撤回。○九年議准。將京營輪流出防。薊鎮車戰兵二枝。每歲秋防。俱暫停止。聽在京訓練。

凡行軍號令。永樂十二年令。凡交鋒之際。突入賊陣。透出其背。殺敗賊衆者。敢勇入陣。斬將搃旗者。本隊已敗。賊衆別隊勝負未決。而能救援克敵者。受命能任其事。出奇破賊成功者。皆爲奇功。齊力進前。首先敗賊者。前隊交鋒未決。後隊向前。殺敗賊衆者。皆爲頭功。○凡建立奇功頭功者。其親管頭目。卽爲報知。妄報者。治以重罪。行營及下營之時。擒獲奸細者。陞賞准頭功。哨馬生擒虜賊一人者。賞銀三十兩。斬首一級者。二十兩。○凡行營之時。遇有鞍馬衣服器械不同者。衣甲器械相同。而喝問荅號不同者。皆卽擒之。來降虜賊。所携人口財畜。分毫不許侵犯。卽時來報。○凡與賊對陣。須齊力殺賊。不許聚爲一處。掣拽空缺。如力不能支。不能決勝。無勇無謀。及不盡力殺賊者。全伍皆斬。○凡隊伍已定。不許馬軍入步隊。步軍入馬隊。違者重罪。如臨陣混戰。失其本隊。插入別隊者。不拘。○凡殺敗虜賊。須盡力進勦。不許搶掠人畜財物。違者重罪。如所乘馬困乏。許以所擒賊馬換乘。○凡對敵之際。一隊遞看一隊。有不齊力前進者。戰勝之後。許連隊之人首告。治以重罪。容情不首者。罪同。○凡管軍頭目。須愛恤軍士。軍士聽令。不許怠慢。如伍中有一人不在。小旗報總旗。總旗報百戶。以次報至總兵官。總兵官奏知。從征官軍有在逃者。斬該管頭目不報者。重罪。○凡軍士須人馬相應。不許以軟弱不堪者。插入隊伍。如人壯馬弱。或馬壯人弱。

者許弱者以馬與壯者。若自己有馬臨戰之際。能借與驍勇者。殺賊有功。許借馬人分賞。不願分者聽。其戰馬臨敵許騎。無事騎者治罪。各營馬驢。須愛恤馱載。該管官時常點閱。有故違。及將軍器拋失。或盜賣者。俱重罪。○凡軍士行糧。該管官旗時行點閱。有過用。及遺棄者。并該管頭目皆斬。○凡軍行。及下營之時。須各認隊伍。不許擅離。及雜人別營別隊。違者併該管頭目俱重罪。○凡夜行相遇。卽喝問有答號。不得者。擒送辯驗。果是奸細。照例陞賞。故不答號。及見而不擒者。事覺俱治以重罪。○凡軍中遇夜。以各樣大小銅角笛聲爲號。不許聲音相同。各聽號聲。識認隊伍。不許叫營。違者論罪。但夜間有喧譁者。卽問所起之處。及左右應聲之人。與該管頭目皆治以重罪。○凡行營。須待大營旗纛起行。或聽駕前銅角聲。各營方許起行。每日下營量撥步軍或五隊十隊。馬軍五隊或三四隊。步軍披甲馬軍不摘鞍。伺候長圍。及架砲者。布列已定。方許入營休息。有盜人衣糧諸物。及盜驢馬宰殺。并檢括隱藏人遺失物者。俱斬。知情實首者。給賞。知而不首者。同罪。若收得馬驢羸塚者。卽送該軍轉送大營。召人識認。如有遺失。被後哨官軍收獲者。收後官治以重罪。○凡各營有失火者。卽是與賊遞送消息。并該管頭目俱重罪。其每日行營。不許在途炊飯。違者。并本管頭目皆斬。下營掘井。必令人監守。不許作踐。及占藏自用。○凡軍中有病者。管隊官旗。卽令醫療。掌藥料官。及醫士常加巡視。不許勒取財物。違者重罪。○凡長圍。及坐冷者。須晝夜關防。各營架砲者。務依方瞭望。有灰塵揚起。人馬往來。若聞哨馬營及四面砲響。卽時傳報。其管事官遇

有事隨即飛報。不許頃刻遲慢。○凡掠陣官臨敵時。視有畏避退後者。卽斬之。紀功過官。遇有功者。卽紀之。有過者。卽錄之。以憑賞罰。○凡臨陣。令內官持象牙牌。視有勇敢當先殺賊。能立奇功頭功者。卽與牙牌收執。徑赴大營。給與勘合。以憑陞賞。○凡軍中有妄談災異。及妖言或漏泄軍機者。皆斬。知情不首者。罪同。首實者重賞。○凡見鹿。及野馬。黃羊諸物。驚走突入營伍。及望見塵起。及旋風揚沙。野獸騰踏。及見死馬牛羊。與牛羊駝馬遺穢踪跡。或拾得一應物件。若男女衣服首飾。并文字等項。不論久近。隨即報知。○凡軍行在道。不許圍獵。或遠望似馬。非馬。似鹿。非鹿。似人。非人。白日見煙。入夜見火。不論是非。卽報。○凡功次務須實報。有虛誑者重罪。所報實者。給與勘合。無勘合者。不准陞賞。○凡號令總兵官告都指揮。都指揮告指揮。指揮告千戶。千戶告百戶。百戶告總旗。總旗告小旗。小旗告軍士。務令遵守。○正統十四年。令每隊伍中立公正掌令官二人。務令頭目軍士。死生相顧。臨陣有進無退。若頭目不顧軍士。先自退怯者。掌令官卽斬其首。別選頭目代之。若軍士不顧頭目。先自退怯者。許後隊斬前隊。准常功陞賞。軍士不勇不進。致頭目失陷者。斬其全隊。頭目不勇不進。致軍士失陷十人者。斬首。至二十人者。斬首不與承襲。至三十人。及全隊者。斬首籍沒其家。凡軍士頭目。應斬而有奇功者。量與贖免。其總兵官申令不明不嚴。致一隊退怯者。罰俸一年。至三十隊者。降二級。至五十隊以上者。罷職。全軍退怯者。斬。但降敵者。全家斬首。籍沒財產。行軍之際。有敢搶擄民財。至十貫以上者。斬首示衆。頭目縱容軍士。搶擄至十人者。罷職。

充軍二十人以上。至全隊者梟首營門。軍士並皆處死。軍中及召募新來之人。不知軍法。敢有造言惑亂人心。阻撓號令。致壞事機者。凌遲處死。籍沒其家。臨陣在逃。及不聽總兵號令者。斬。○成化元年。令總兵官出師。臨敵。軍士有違犯號令者。聽以軍法從事。尋常出哨等項。不許。○弘治十三年。奏准。凡官軍遇有征調。點選已定。避難在逃者。依律問斷。若征期已過。發宣府獨石等處。沿邊哨瞭半年。滿日回衛。若仍發出征。及哨瞭。而復逃者。依從征私逃再犯者律處絞。

凡優處官軍。嘉靖三十六年。題准。五城兵馬司。凡遇在京各衙門詞訟。係干營操官軍。除人命強盜重情外。其餘小事。輕犯。或干證應審。俱要具申該營散拘審問。早爲發落。毋得輕易監禁。致妨差操。違者聽兵部及戎政大臣參究。○四十二年。題准。五城。及在外附近府州縣。以後京營官軍。正身免其民差。戶下餘丁。照丁派差。如犯人命強盜重情。及戶婚田土。正犯應該對理者。一面提問。一面行營轉行戶部。暫扣月糧。聽候發落。若止因牽告干證。不許一槩監禁。○又議准。京營將官有犯奸贓。各該衙門會同戎政衙門。查究明白。方許參提。○四十三年。題准。京營軍士。刁潑成風。藐視將領。投帖訐告。甚至兵馬司。輒行拘執。弓兵番子。凌虐百端。今有軍士敢有仍蹈前非者。拏問重究。將領貪婪失職。戎政大臣。巡視科道。不時論劾。不得輕准軍士告詞。有傷大體。○萬曆三年。題准。京營號頭指揮等官。但有干連官軍。及承告軍官。不公不法等事。須要密切實封奏聞。不許擅自勾問。其軍職并土官有犯強盜人命等項。真犯死罪者。先行

該管衙門拘繫備由奏提。

凡犒賞將士嘉靖三十二年令各邊將官見在京營者每月給米五石養贍家口在京軍官不許混支○又奏准戶部徵收京營草場子粒銀兩共一萬三千五百兩有零今後每年徵解兵部貯庫按季聽戎政大臣印信手本到部關支前去賞軍等用按季將收放數目填造文冊一樣二本一送兵部一送科道查考○四十三年議准邊方調赴京營管領家丁千總等官許於節年官軍逃故扣除糧內月支米三石戰馬料草於扣省料內支給○隆慶二年題准戎政大臣將營中各項銀兩仍入庫收貯就於營操官內選擇廉幹者一人專司其事凡遇犒賞公費量數給發其椿朋銀兩依期呈報戎政衙門貯庫季終差官類解太僕寺庫仍置文簿付本官收掌逐一登記錢糧如有侵漁聽巡視科道不時參論○五年題准營中子粒銀兩俱要責令該管官員赴巡視科道官掛號方許支用有那借隱匿者聽科道官參究凡營馬查點宣德九年命兵部官同御史給事中點視征操馬匹借點及借與者其追馬一匹馬無見在及隱瞞不報者查追仍勘其冒支草料加倍追納○嘉靖元年題准拐馬在逃官軍俱限一月以裏出首免其送問發營差操如限外出首及被挨拏到官俱送法司問罪初犯再犯及原拐馬見在者俱照舊責打發落官免降級若三次以上及原拐馬或餓死或變賣者不分官軍俱照舊例京衛調外衛外衛調邊衛追馬完日官降一級於見調衛所帶俸差操不許管軍管事事故之日子孫聽回原衛襲替祖職若官

軍偶因馬匹病死。懼追椿銀。及隻身患病。無人告官者。勘實照常發落。○十三年題准。團營馬匹。令兵部差官。會同科道。通查三大營貧軍所領之馬。一一交與得過營軍領養。除上臚中臚。聽其自養外。其無臚之馬。行點軍科道等官。揀出留家調養。一兩月後。驗有臚者。免其會餒。仍嚴禁餒糟。若被兩鄰告發。或在營驗出。皆送法司問罪。○三十年議准。令太僕寺少卿。每月三次赴教場點驗各營馬匹。分別三等。上臚中臚者。聽令領養。無臚馬匹。責治本軍。其副參佐擊坐營號頭把總等官。務要嚴督各軍。禁革剋削草料。顧借騎馱等弊。年終照例以百匹爲率。倒失十匹以上者。該營官送問。七匹以上者。罰治。全無倒失者。量加犒賞。其椿朋銀兩。照例按季造冊送部。查算明白。用印鈐記。轉送戶部臨倉扣糧。○萬曆三年題准。太僕寺調取寄養馬。轉行提督京營馬政少卿。會同兵部委官。公同兌給缺馬。官軍領騎。完日將兌給過馬匹。毛齒官軍姓名。造冊呈部查考。仍行總督大臣。查照原議。每年終。行令各營將領。備查缺馬數目。造冊送部。以憑行寺補給。永爲定例。○四年題准。每上半年於住操之時。看驗一次。下半年於印烙之時。照舊規稽查。通行部寺科道各官。會同五軍巡捕等。各營馬匹。通行檢驗一次。瘠損者懲治。老弱者變賣。屢懲不悛者。轉兌別軍。本軍從重究治。以示懲戒。該寺仍將驗烙過各項馬匹數目。造冊奏繳青冊。送部查考。凡營馬草料。嘉靖七年議准。京營將官本身騎征馬匹。按月關支料草各一分。○十三年題准。團營馬匹。勅令戶部將存操馬匹。再添三箇月草。下場馬匹。再添六箇月料。三箇月草。通融放給。以穀一年之用。○

二十一年題准。將二官廳并十二營馬匹。除冬春料豆本折照舊關支外。其夏秋料豆原議本折關支內折色。每石量增銀五分。共銀三錢。草束除本色照舊關支外。其餘該支折色之月。量增銀五分。共銀三錢。按月關給。

【將軍營】

錦衣衛侍衛將軍。自爲一營。遇下班之日。照例操練。從管領侍衛官提督。其例具後。

計開見在營官勇士。

坐營指揮四員

勇士五千四百三名

凡大漢將軍選補。弘治四年奏准。錦衣衛大漢將軍。務勾一千五百名。若缺五十名。方許開申選補。其將軍務要身長五尺三寸以上。力勝三百五十斤。及無惡疾。體氣過犯。不係正軍。及犯極刑之家。方許收用。○近例將軍有缺。錦衣衛堂上官會同科道官。并管領將軍官選補。○又例大漢將軍官旗。五年一次。兵部錦衣衛堂上官各一員。會同兵科都給事中。并管領將軍官。揀選去留。內千百戶有缺。就行照例推補。大漢將軍有缺。除將先年選定者挨補外。如隨伍將軍。有體貌魁偉。特出衆人之上。得超補見缺。凡將軍替補。嘉靖三年議准。將軍上直侍衛年深。授有官職者。事故之日。許令嫡親兒男。查照舊例繼補。

其餘將軍事故。止許收充校尉一輩。不許將房族人等收補。○二十四年題准。選退將軍兒男。查係應役十年以上者。許充校尉。不及年分者。止與力士。著爲定規。○三十七年題准。選退將軍兒男。改充力士者。照校尉例。止許補當一輩。○萬曆二年題准。錦衣衛將軍。千百戶侍衛三十年以上者。兒男許替冠帶總旗。將軍侍衛二十年以上者。許替校尉。二十年以下者。止與力士。俱止准一輩。其應役三年五年。照舊查革。永行遵守。

凡將軍清查。嘉靖九年。令兵部錦衣衛堂上官各一員。會同兵科都給事中。清查見役將軍。若有虛冒買閒等弊。具奏處治。

凡將軍在逃。正德七年奏准。在逃三箇月以裏。不曾拐馬。許其首復。拐馬者調衛。若過限外。不許首復原役。

【四衛營】

騰驤左等四衛勇士。軍人餘丁。別爲一營。從御馬監官提督操練。其坐營等官。並於四衛指揮等官。推選其初。以處迤北回還者。後多以買馬投役。弘治末年。奉命清查。冒濫頓減。正德間。漸增至一萬五千。嘉靖初。特定額數。爲五千四百三名。除隨駕擺列。例用五千三百三十名。其餘以備逃亡事故之數。後該監累乞收補。不允。命仍照初例。如數補足原額。不許違旨奏擾。至今遵守云。

計開見在官軍

坐營指揮四員

官舍旗軍六千五百四十九員名

凡軍士收補宣德九年令凡迤北走回軍餘民人俱收充御馬監勇士○成化年間令兵部委官一員驗軍食糧凡在京各監局并四衛勇士軍人俱要審驗著實方許食糧○十九年令騰驤四衛軍士戶絕例不清勾若戶丁告補者查無詐冒方許收役

凡軍士清查弘治十八年令兵部侍郎會同科道官清查四衛軍士今後遇有進充及補役復役俱有兵部審勘驗發方許收糧如有作弊本身并該管官旗問調南方極邊衛分○正德十六年詔四衛勇士除弘治十八年經兵部科道清查見役正數并事故外其餘詭名冒籍未經裁革仍又彘緣回衛虛掛名額者各照原擬軍發原衛民丁發在京缺軍衛分各充軍役食糧差操以後勇士替補照例開送兵部委官處驗過方許收糧○嘉靖八年奏准清查過四衛勇士備行該監并騰驤左等四衛將應存留者照舊食糧差操內有年老無子身終之日卽與開除名伍應候缺者如遇事故缺伍除迤北回還親生子孫勘無違礙徑令替補外其餘進充勇士缺至十人之上該衛卽申兵部知會先儘見故子孫方許將候缺人役開送兵部驗軍主事從實揀選年力精壯者照名充補俱止終本身如候缺人役充補已盡又有事故缺

伍仍照前例再行揀選收用其應該革退若願投軍者行委驗軍主事驗係壯丁查發缺軍衛所充軍仍送神機三千五軍等營操備○又議准騰驤左等四衛官旗勇士軍人行點軍科道官照例點開○三十年議准將四衛營軍士通行查勘有影射占役者盡數退出赴營操備詭名冒糧者悉行裁革有馬軍人倒失馬匹照三大營軍士一體追納椿朋銀兩○四十三年議准行御馬監太監將應操軍士如法訓練果有成效聽兵部將原缺人役陸續驗補椿朋子粒錢糧仍聽科道查理○隆慶元年題准騰驤等四衛勇士查照嘉靖八年事例請勅兵部侍郎會同御馬監巡視京營科道逐一清查不許詭名頂替虛糜糧食○萬曆二年議准各營見操軍勇務令一一著伍影射者聽巡視科道參究

凡軍士撥役嘉靖八年奏准御馬監役使軍伴勇士掌印太監撥與五十名內勇士十名軍伴四十名坐營太監每員三十名內勇士六名軍伴二十四名僉書太監每員十八名內勇士四名軍伴十四名左右少監每員十二名內勇士三名軍伴九名左右監丞每員十名內勇士二名軍伴八名坐營都指揮每員止軍伴十名典簿并不僉書太監每員軍伴六名不僉書左右少監并把總指揮每員軍伴五名不僉書左右監丞每員軍伴四名掌司房長隨內使每員軍伴三名內官長隨內使奉御每員軍伴三名長隨內使并管隊官軍伴一名前項勇士軍伴俱行兵部驗軍主事查照議定名數就行騰驤左等四衛撥與應用

凡營官推補。嘉靖四十三年議准。行御馬監太監將四衛營中軍坐營等官。從公推舉。○萬曆二年議准。勇士四衛二營。各裁坐營官二員。止選留二員。令其統領開操。除直宿外。餘日著實訓練。○三年題准。四衛營坐營官缺。推補原屬兵部。於四衛指揮等官內選用。其御馬監官止提督操練。不得干預。止聽其開具相應官員。送部查訪疏請。如或不堪。聽於京營大號頭中軍千總。及京衛掌印官內。另選廉幹官。照缺推補。

明會典卷之一百三十五 兵部十八

【大閱】

古者大閱以講武事。蓋安不忘危之意。國初車駕親征。則隨地閱武。宣德正統間。或閱於近郊。於西苑。然不著令。隆慶三年。因輔臣建議。於三大營教場舉行。萬曆九年。上親大閱。一如隆慶中故事。今具列焉。

隆慶二年題准。營兵驕惰。宜設法訓練。自隆慶三年爲始。於冬季農隙之候。恭請聖駕親臨閱視。甄別將官。考校軍士。以爲黜陟賞罰。○又題准。聖駕閱武之日。三大營官軍。俱先期在營拱候。內選有馬戰兵二千名。委官四員分領。前導後隨。候入教場。仍以次各入營伍。其守門擺隊官軍。於城守備兵巡捕。并錦衣衛鎮撫司軍撥用。仍先請命文武大臣。總理提督各該守門內外官軍。每門添差京堂一員。錦衣衛千戶一員。廢棄將官一員監守。至日三大營馬步官軍除城守圍宿外。其餘戰兵十枝。車兵十枝。照常演陣。畢請旨閱射。公侯駙馬。伯錦衣衛官。及副參遊佐。坐營號頭。中軍千總等官。俱於御前較閱馬步箭。馬上人各三箭。步下人各六箭。其鎗刀火器各量取一隊試驗。其把總以下。及家丁軍人射箭等項。令府部大臣四員。於神樞神機各廳分投校閱。差御史四員。兵部司官四員。公同監箭。次日各官將校閱過等第具奏。○又題准。閱視以箭數分賞罰。職官一等內。有馬中三箭步中六箭者。先賞十兩銀牌一面。紵絲二疋。

折銀五兩。若平昔無過曾經薦揚者。仍附記在簿。特加超擢。馬中三箭。步中四箭。五箭者。先賞五兩銀牌。一面。色段二疋。折銀三兩。若平昔無過者。亦附記錄用。若平昔官箴有玷。謀勇無取。止是厚賞。如係公、侯、伯在超擢錄用之例。除賞賚外。遇有兩京坐府員缺。依次擢用。若止是馬步二箭。至三箭者。賞三兩銀牌。一面。色紗一疋。折銀一兩。馬中二箭。步中一箭者。賞一兩五錢銀牌。一面。或馬中而步不中。或步中而馬不中者。姑准策勵供職。若馬箭不中而步下中三四箭以上者。量賞一兩銀牌。一面。馬步俱不中者。係公、侯、伯。罰住祿米三箇月。係錦衣衛。并各衛願射官。各罰俸三箇月。係營中將領。罰俸半年。若平昔有過者。係京衛革任隨營操備。係外衛革任回衛差操。其軍士中。有能馬中三箭。步中六箭者。賞銀一兩。紅布三疋。折銀一兩。馬中三箭。步中五箭。四箭者。賞銀一兩。紅布一疋。折銀三錢。馬步俱中二箭。至三箭者。賞銀一兩。馬中二箭。三箭。步中一箭者。賞銀四錢。或馬中而步不中。或步中而馬不中者。姑免責治。若馬箭不中而步下中三四箭以上者。仍賞銀四錢。馬步俱不中者。照例決打。若係教師家丁。仍革支月糧一石。舞刀、鎗、鈎、鏢。上等賞銀三錢。紅布一疋。折銀三錢。次等賞銀二錢。三等免其責治。四等照例決打。次日總協戎政官率將佐等官。各具朝服上表謝恩。文武百官。具朝服侍班。行稱賀禮。次日。上御皇極門。賜勅總督戎政。捧至綵輿。將士導引至教場開讀。卽日賞賚將士。并戒罰有差。

武舉之法。試其謀略藝能。列其等第而推用之。累朝選試陸用法各不同。具列於後。天順八年。令天下文武衙門。各詢訪所屬官員軍民人等。有通曉兵法謀勇出衆者。從公保舉。從巡撫巡按會同三司官考試。直隸從巡按御史考試中者。禮送兵部會同總兵官於帥府內試策略。教場內試弓馬。答策二問。騎中四矢。步中二矢以上者。爲中式官。量加署職二級。旗舍餘丁授所鎮撫。民授各衛試經歷。俱月支米三石。若答策二問。騎中二矢。步中一矢以上者。次之。官量加署職一級。旗舍餘丁授冠帶總旗。民授各衛試知事。俱月支米二石。並送京營。量用把總管隊聽調。有功照例陞賞。○弘治六年定武舉試策二道。文理優。韜略熟。及射中式者。陞二級。文不甚優。射雖偶中。止陞一級。雖善行文。射不中式。及射雖合式。策不佳者。俱暫黜。以候再試。中者送團營。或分送各邊。俱贖書。或把總。或守備。城堡。免令管隊。後每六年九月一次考試。軍衛有司。果有才堪應舉者。聽於應試之期。禮送赴部。考退生員。并曾經間斷。行止有虧者。不許。凡再試不中者。發回原籍。供本等職役。後又令先策略。後弓馬。如策不佳。卽不許騎射。或答策雖佳。不能騎射者。亦黜。後又令中式舉人。添支月米。遇陞用之日。卽與住支。○十七年奏准。武舉三年一次舉行。一日答策。次日射箭。考試策略弓馬俱畢。中式者照例擬陞。仍將中式姓名。做文舉事例。出榜賜宴。俱送團營聽用。願回原籍者。許撫按官推選軍政。○正德三年奏准。武舉開科之年。預行兩京并十三省各衙門。曉諭各色人等。如有究極韜略。精通武藝。身家無礙者。許各赴所在官司投報。俱從撫按

官。公同三司官考試。起送赴部。○嘉靖元年議准。武舉官生。兩京武學於兵部月考優等。選取在外聽巡。按御史考試。選取每遇開科之期。兵部堂上官。并提督京營總兵官。統領大綱。兵部屬官。分理衆務。初場較騎射。二場較步射。俱於京營將臺前。三場試策。二道論一道。於文場內。先期請命翰林官二員。爲考試官。給事中。并部屬官四員。爲同考試官。監察御史二員。爲監試官。其答策有能洞識韜略。作論有能精通義理。參以弓馬俱優者。中式。其策論雖優。而弓馬不及。或弓馬偏長。而策論不通。俱發回。候開科再考。中式官生。照文舉事例。梓名。賜宴。仍俱陞署職二級。月支米三石。指揮以上。斟酌推用。署千戶。百戶。鎮撫。總旗。俱送各邊總兵等官處。贖畫。及守堡聽調。殺賊。應得俸糧。并加添米石。俱於原衛所支給。獲有軍功。照例加陞。五年無功者。發回。○六年題准。各邊總兵將贖畫武舉人員。量材發定衛所。照依在邊各官。隨營供職。撫按官不時查考。如有掛名不到。及攘買功次等弊。指實參奏。○八年題准。取中武舉官生。各照陞授職事。俱月支米三石。內有應襲舍人。候襲替之日。照例加陞。通送團營將臺。下寄操。指揮於本衛。都指揮在京者。於本衛。在外者。於本都司。各帶俸。俱候推用。千戶以下。照例分送各邊。聽撫按衙門委用。應得俸糧。并加添米石。俱於原衛所。并今駐衛所支給。指揮等官。一時推用未及。若有願回原籍者。咨送撫按官處。照依品秩委用。千戶以下。除能立軍功陞級外。其間果有才能出衆。曾於所在地方贖謀効力者。不拘有無軍功。聽撫按官指實薦舉。五年滿日。兵部酌量奏請。千戶量加署指揮職銜。百戶以下。量加署千

戶職銜令把總備邊守口掌印僉書若能建立奇功一體超用其贊畫官員五年滿日兵部審驗才力有
用再發各邊贊畫五年通前十年之上再無軍功又無薦舉兵部再驗其才委無可取及年老殘疾即將
所加米石停止其武舉所加署職非有軍功雖遇恩例不得實授加添月米日後陞職所得俸米過於所
加三石之數即將所加米石住支止支本等俸給前項官員若有犯該革任帶俸閒住者不論官職崇卑
但係武舉加陞俸米俱行停革永不推用應襲舍人照例施行○十四年議准武舉千戶以下不願贊畫
者查原籍原衛如係邊方兵部即咨各該撫鎮等官酌量差委推用其腹裏地方行撫按衙門兩京地方
悉聽兵部及行南京兵部各量材委用以後雖無軍功但積有年勞累經薦舉者與指揮以上一體推用
若十年以上未著賢勞亦無薦舉及審年力雖有不堪原非犯該革任帶俸閒住人員各該衛所開報前
來其原加米石臨時議處○十七年令武舉定於秋行以後開科俱於九月行事○二十二年議准武舉
開設務求真才取人不必拘定名數仍照會試南北卷事例分別邊方腹裏以薊鎮昌平遼東萬全宣府
大同山西陝西延綏甘肅寧夏雲南貴州爲邊方以兩京京衛南直隸浙江江西福建山東河南湖廣廣
東廣西四川河間順德大名廣平眞定保定爲腹裏如每科五十名邊方取三十名腹裏取二十名○二
十六年題准武舉中式人員其在腹裏若有才堪邊用願立邊功者起送兵部再行考驗革去贊畫名色
分送九邊總兵參將委領管軍殺賊○三十二年議准三次鄉試中式武舉官生查照文舉會試事例免

其再試。徑許赴京會試。○隆慶二年議准。武舉中式者。分邊腹二項。以後邊方有缺。卽先推邊方第一人。腹裏有缺。卽先推腹裏第一人。各挨次推用。一如文舉挨次法。○四年議准。凡天下軍民人等。力勝五百斤。或四百斤。三百斤以上。及武藝超衆者。府州縣呈送撫按。嚴加考校。如果藝勇不凡。量給衣巾。充爲武生。開科年分。除精通論策者。聽隨武舉入場。其餘候場事畢日。撫按復行驗中。行該府給文到部。會試之年。照例於武舉場畢。將各送到選中之人。公同監試御史。通行考驗。不中者。發回肄業。中者爲首一人。量給冠帶。隨宜委用。餘俱分發薊鎮。其力舉五百斤者。留京爲教師。食糧練軍。三年有成效。量陞職級。○萬曆二年議准。錦衣衛及各衛武舉千百戶等官。年深未經咨送效用者。俱送京營委用。限以三年。再無薦舉。卽將武舉米石。照例住支。係世官者。止支本等俸糧。係旗軍舍餘。卽令閒住。○五年。令御史監試武舉。嚴加巡察。有違犯者。照文舉例行。

【舉用將材】

凡武官奉旨陞任者。或一級或二級。卽遵旨照級授官。屬武選司掌行。若謀勇出衆。累經薦舉者。難拘資格。卽不次超遷。或曰量陞。曰署。曰以某官行事。曰奉欽依。皆屬職方司。故有舉用將材之例。宣德五年。令天下都司衛所於所屬官。及行伍內。每歲選智勇廉能者一人。送京試用。○成化八年。令文武官員軍民人等有諳曉兵法。謀勇過人。弓馬熟閒者。並許保舉。試中者無官授以冠帶。有官仍舊職。撥

團營操練聽調邊方舉者。就各邊操備。其有才兼文武堪爲大將。恥於自進者。府部都察院通政司大理寺科道并在外衙門各舉所知。○嘉靖六年。令於各邊空閒都督。都指揮及副參遊擊等官。內舉保曾經戰陣。謀勇可觀者。行取聽用。○七年。奏准兩京堂上官并科道。及在外方面官員。如有指揮以上等官。曾經領兵效勞者。不拘見任閒住。從公舉保。○二十一年。議准將官犯罪。除犯有贓私。永不敘用外。若是地方失事。重者擬死。其次充軍。其次爲民。其次革職閒住。其次於實職上降級。其次於流官上降級。如總兵降副總兵。副總兵降參將守備。果有後效。仍以次陞用。此外如有謀勇異等。沈淪行伍者。許各該總督撫按官一體薦舉。試驗果實。破格收用。○二十二年。議准腹裏官軍。曾經薦舉。有願赴邊方立功者。本處巡撫官咨送軍門試用。○二十八年。題准行六科十三道及巡視京營科道總督巡撫巡關等官博訪。不拘軍民職官。山林草野武舉會舉。見任革任。及有過廢棄人員。但有諳曉韜略。熟閒弓馬。膂力過人。謀猷出衆者。不拘名數。各舉所知。開列上陳。以次酌用。○隆慶二年。詔各邊將領等官。有素著謀勇。累立戰功。偶因失事。革職閒住。及充軍等項。年力未衰。猶堪任使者。撫按科道官查訪。疏名奏請定奪。○萬曆元年。議准在京四品以上及科道官。在外總督鎮巡等官。各延訪不拘見任隱逸。及被論聽勘革棄等項人員。自上總兵下至卒伍民庶。某可爲大將。某可爲偏裨。某可備先鋒。及遠使外夷。據實開註。每人或舉一二員名。或三五員名。具奏兵部再加品階。並將舉主職名題覆附簿。聽備緩急推用。如樹有功績。賞及舉主。或

狗私濫舉。以致債事。舉主一體議罰。○十三年。令各處武職有勇略出衆廉潔愛士者。各督撫官加意詢訪。不時咨部。備查奏保。酌量推用。先儘指揮。次及千百戶。鎮撫。以及近科武舉。

明會典卷之一百三十六

兵部十九

【巡捕】

國初捕盜在外無專官。惟在京設五城兵馬指揮司。以巡邏京城內外地方爲職。其後在京添用錦衣衛官校。成化末加撥營軍。弘治以來。在外添設捕盜通判。州判主簿等官。而諸法禁亦漸詳密。今備列于後。

在京

巡捕官

提督官一員

中軍官一員

左右參將二員

地方把總一十二員

城內東邊二員

西邊二員

城內東北二員

西北二員

東南二員

西南二員

尖哨把總官六員

左右掖二員

左右哨二員

前後哨二員

額定官軍一萬一十八員。名馬五千六百四十一匹。今見在三千四百六十四匹。

凡京城巡捕。正統八年題准。南城兵馬委官督同火甲於南海子外巡捕。○成化四年。以京城內外多盜。令錦衣衛指揮一員。同巡城御史專一提督五城兵馬。并巡捕官校挨拏。○二十一年。奏准團營摘撥精壯馬隊官軍二百員名。隨同官校併力拏賊。○弘治元年。令三千營選委指揮千百戶四員。各管領精壯馬軍三十名。於京城外高密店、義井兒、良鄉、清河四處地方駐劄。隄備盜賊。一年更替。○又令錦衣衛委官十五員。并旗手等十五衛委官各一員。選帶旗軍各二十名。分定地方。相兼緝捕巡警。○二年。添撥鄭村壩巡捕有馬官軍三十名。○又題准。巡捕官軍各給團牌。以便夜巡。○三年。令上直衛分共十五衛。各撥官軍二十一員名。分派五城空閒寺觀十五處。駐劄捕盜。○七年。奏准於團營摘撥官軍三十名。委官一員管領。於弘仁橋巡捕。○十五年。奏設巡捕把總都指揮一員。提督高密店等七處地方。每處仍委千百戶各一員。以半年更替。○十八年。奏准團營提督官於十二營內。每季輪撥馬軍一百二十名。選委千百戶各一員管領。於長安、東西二門、天師庵、草廠、大慈恩寺等處巡邏。聽兵部主事。并巡城御史點閘。○正德三年。添設巡捕把總指揮一員。與原設把總分管京城外地方。一員管東北。一員管西南。一年更替。○七年。令京城巡捕把總指揮二員。一月更替。○十年。議准京城內外巡捕官軍。城內東西二路。把總官二員。委官八員。各分管地方。每委官一員。馬軍四十九名。步軍五十名。共軍七百九十二名。馬四百匹。城外東北西南二路。把總官二員。每員領有馬官軍五十員名。照舊海巡。分管官七員。每員馬軍一百六十

名共軍一千一百二十名。馬一千一百二十四。○十六年奏准添撥團營有馬軍二千員名。責付原委四路把總指揮。相兼原領官軍於該管地方巡邏緝捕。仍推都指揮一員充參將。請勅提督巡城御史同兵部委官不時點閱。○嘉靖元年題准添設城外巡捕把總指揮一員。及添撥官軍一千員名。城內分東邊西邊城外分西南東南東北共把總指揮五員。官軍五千餘名。南至海子北至居庸關西至蘆溝橋東至通州分投巡捕。又於內揀選精銳五百員名立爲尖哨。加給行糧。每名月大米四斗五升。月小米四斗三升五合。俱自置盔甲什物。遇警調用。○七年題准天地壇巡捕官軍止於牆外巡邏。其壇內令本壇巡風員役巡看。不許容留外人。○十一年議准通州張家灣一路錦衣衛每季擇委的當謹慎官校緝捕盜賊。姦細妖言及機密重情。不許干預詞訟。囑託公事。及比較打卯。用強奪功。違者聽該地方撫按巡倉等官指實參奏。拏問。若緝獲賊犯。即便拏送分守或州衛官處鞠審明白。解送該衛施行。○又題准巡捕官軍五日換班。於宣武門外操演。有倒死馬匹者。先於太僕寺領馬。其該追椿頭銀兩。候年終追完。送太僕寺。○又題准巡捕官軍每二員名。共給雨帽氈衫一副。上班披帶巡邏。下班交付接班之人。○十三年題准令在京巡捕參將將尖哨一百名。分作兩班聽兵部差遣。爪探聲息。其餘盡數點齊。照巡捕所管地方。分爲七路。每十里設置塘馬二匹。軍一名。十日一替。具呈兵部各路定委提調官二員稽察。每年六月初旬分撥擺塘。待十月初旬掣放。如有非時警報。兵部票傳擺設。不拘定期。○十五年奏准於尖哨官軍內定

撥精銳四百員名。就委原管尖哨把總千戶。添委指揮一員。分爲兩班。在於城內武藝庫駐劄。不外寒暑。於阜城門外。首宿空地。輪日常川操練。遇警分調。○二十一年。添設巡捕官軍五千員名。○三十一年。題准。兵部劄委司官一員。監同巡捕參將。在民兵教場內。操練巡捕官軍。○三十五年。題准。兵部劄委司官一員。督同巡捕參將。在工部鐵廠。將巡捕官軍常川操練。○三十七年。題准。添提督巡捕參將一員。革去原管主事。著兵科給事中一員查點。○四十二年。題准。以後巡捕營事務。不必另差給事中。兵部劄委司官一員專理。其巡捕官軍倒損馬匹。并聽京營科道參奏。○又題准。巡捕官軍馬匹。折支料草銀兩。把總官造冊。提督覈實。聽兵部管理。巡捕郎中查覈。徑赴巡視太倉科道掛號。往戶部關領。京營科道不必掛號。○又議。令巡捕軍士。照三大營事例。老弱不堪者。許令的親兒男。弟姪。徑自送部復驗收伍。摘牌更替。○四十三年。題准。巡捕營新抽操軍三千名。仍令督捕郎中公同提督查出。與同別軍分爲兩班。上班夜巡。下班操練。如仍前役占聽郎中并科道參究。但有地方失盜。該管把總。卽報兵部督捕郎中。仍登記文簿。以便稽考。如果失事數多。將提督官一併參究。○萬曆元年。題准。巡捕營尖哨務足原數。不許掣動。內有行糧尖哨一千二百名。定爲一等。黑夜巡邏。白晝駐守。無行糧尖哨一千八百名。定爲一等。照舊下夜。凡有馬匹先儘尖哨。不許走把軍士謀領。其巡軍下夜。與各衙門看庫等雜差。俱要更換。以均勞苦。如有懸差一年以上者。卽開除名糧。○三年。題准。太僕寺撥馬四百匹。給巡捕官軍。巡捕軍缺參將每月終呈

職方司轉行各衛所掌印官許將本軍戶下兄弟子姪年力精壯者赴部告補如本戶無人以別戶丁多軍餘頂補通聽督捕郎中勘結明實發營當差○又議准行令提督官定擬責任將該營四至會同鄰境官司畫地分區設立界牌永爲遵守交界五里之外遇有盜賊生發仍協同策應擒捕不得坐視○又令巡軍拏獲盜賊該營審取賊證真實兵部并京營科道覆審的確批發該城兵馬司備錄批詞將賊并賊送法司問理巡軍聽其卽回地方巡邏不必拘留待對居民被盜當時喊叫官軍不與緝拏者方許具告聽提督官比併把總嚴限緝拏如過三日後告者不准凡犯夜之人聽巡軍拏送提督發落○十二年題准凡京城內外遇有盜賊竊發自卯至申責成兵馬司屬巡城御史參究自酉至寅責成巡捕營屬巡視科道參究但遇失事之時立刻申報不許遲延隱蔽賊情重大仍要協力捕剿毋以晝夜推諉應緝盜賊查自何官捕獲各論功敘錄

在外

凡各府州縣巡捕弘治五年題准通州涿州德州河間分守守備官及武清衛捕盜官遇該朝覲會試之年統領附近衛所京操下班馬軍分班巡捕○十六年奏准四川各州縣添設判官主簿各一員捕盜○正德六年奏准添設江西贛州南安瑞州廣信四府福建汀漳二府湖廣鄖陽武昌岳州衡州永州五府陝西漢中府四川保寧重慶夔州三府及兩廣各府捕盜通判各一員○十二年添設山東青州府捕盜

通判○十四年添設福建福州府捕盜通判○十五年議革湖廣衡州府捕盜通判以撫民通判管理○十六年添設雲南大理府捕盜通判○嘉靖三年令河南彰德衛輝二府管馬通判懷慶河南二府協管府事通判各兼管巡捕○十一年添設真定府巡捕同知一員○二十七年添設福建南靖詔安二縣巡捕主簿各一員○三十四年題准令浙江等處南北直隸撫按等官嚴行各該司府等官遇有盜賊生發一面設法緝捕一面懸示賞格除曾經殺人放火奸淫婦女真正強賊不貸外其同上盜而未曾分贓雖分有微贓而不會同盜與夫脇從妄攀之人俱免本罪果能捕獲賊首送官者仍加陞賞○隆慶五年題准各巡撫都御史嚴督各官守備如遇地方盜賊生發即便追剿擒捕務期得獲每年終稽查各官下強賊起數分別大夥零賊有無殺人放火并已獲未獲數目定擬殿最另各舉刺○萬曆四年題准令各省撫按衙門以後凡遇盜賊竊發不論打劫官府搶奪商民事情大者不時奏聞次則近者照舊一月一報遠者季終一報歲終類報俱要一面具奏一面嚴督官兵上緊緝拏如有疎怠隱匿聽兵部該科參究○又令兵備官以詰戎弭盜爲職今後但係該管地方失事俱要一體論劄

賞罰嚴衛緝捕附

凡巡捕洪武二年令凡常人捕獲強盜一名竊盜二名各賞銀二十兩強盜五名以上竊盜十名以上各與一官名數不及折算賞銀應捕人不在此限○宣德元年令擒獲強盜賞鈔二千貫爲首官旗軍校陞

一級民匠人等免差役一年。○二年令凡軍官於所轄地方擒獲強盜即係應捕人員不准陞賞若不係該管地方及公差在外擒獲者指揮四名以上千戶衛鎮撫三名以上百戶所鎮撫二名以上照例陞賞旗校軍民匠役等不限地方。○弘治元年令巡捕官軍能擒白晝騎馬劫財強盜照依沿邊殺賊事例一名陞署一級。○又令有能緝知強賊報官拏獲不分官員軍民舍餘人等照例陞賞同夥賊伴出首免罪還將賊犯家財量賞。○二年令捕獲出境妖人構結夷人謀爲不軌者爲首陞二級爲從陞一級應捕人役若賊衆勢兇登時擒獲三名者爲首陞一級爲從給賞或被傷害子孫陞實授一級世襲若非應捕能登時并三月以裏緝獲者量陞一級月久者給賞凡因捕盜已陞者後再有功止照例給賞違例乞陞保陞者許科道劾治。

凡在京巡捕成化二年令緝獲妖言提督官陞一級官校給賞。○十四年令緝捕妖言者量行終賞不陞。○十九年令官校捕盜官兵百名以上提督官陞一級。○弘治十年令捕盜至四百名以上者提督官陞一級。○嘉靖十一年議准今後不分應捕不應捕人員果係兇惡強盜聚至百人以上有能臨陣擒斬登時捉獲三名以上爲首者准陞一級其非應捕人員果能三月以裏緝獲真犯三名者爲首量陞一級不賞爲從併不及數與緝獲妖言賊人者每名賞銀五兩至十名而止同獲均分拏賊已陞後有功次止照前給賞每陞不過十名給賞不拘名數巡捕把總等官仍照舊例給賞若係平時緝捕強盜數雖不多會

經殺傷人及拒捕并刼財。每賊名下分有贓物。估值銀三兩者。每名賞銀五兩。賊多照前分數遞加至五十兩而止。其所得贓物不及者。照前分數遞減至二兩而止。若係拏獲積年劇賊者。不分贓物多寡。仍賞銀十兩。買奪占爲己功。希求陞賞者。不拘應捕與不應捕人員。俱不准給賞。其地方失事。各該應捕官員。卽要從實呈報兵部及提督官。該城御史附記責限緝捕。限外不獲。該管地方委官。把總。該城兵馬錦衣衛西司房委官。一次二次記過。三次聽提督官并巡視御史參奏。本部按簿查明。奏請提問。○又議准。巡捕官軍人等。但有拏獲強盜。先送提督官處。審係贓仗明白。方許送部轉送法司收問。若所獲本係竊盜。妄作強盜。意圖報功。查發得出。從重究治。○三十七年題准。每年動支太僕寺馬價銀三百兩。寄武庫司收貯。遇有巡捕官軍捉獲盜賊。量給充賞。○隆慶元年題准。京城內外失事。巡捕把總等官。聽京營科道會同兵部委官。各坊兵馬指揮。聽巡城御史。各量失事輕重。參究治罪。嚴限挨拏。左右參將照舊例。若賊明火持仗。一月內連刼三次以上者。徑自參提。其提督并正兵馬。俱候年終聽京營科道。并巡城御史。分別功罪。各令獎舉參治。○萬曆元年題准。巡捕官軍陣前對敵擒獲強盜一名者。爲首賞銀三兩。爲從賞銀二兩。緝獲一名。量賞其半。脅從者。每人賞紅布一疋。花一枝。陣亡。視對敵爲首加倍。被獲視緝獲爲首者。各給恤。參將把總等官。比照廠衛緝獲強賊事例。類議陞賞。○二年題准。京城內外地方。但有盜賊生發。城內三五名以上。城外十名以上。刼財殺人者。該管把總兵馬官員。卽時擒獲者。准免究。仍與論功比

照廠衛事例一體敍錄。若有疎虞先行住俸。拏獲一半以上。方准開支。二十名以上。全數脫逃者。住俸。限三箇月。以裏。拏獲一半以上。姑免參治。過限不獲。罰俸三箇月。仍令戴罪拏賊。若三十名以上。不分擒拏。在逃。參治革任。○十一年議准。京城內外。但有強盜得財傷人者。巡捕把總兵馬等官。即時擒獲。免罪。仍論功敍錄。若有脫逃。俱卽住俸。限三箇月。以裏。拏獲一半以上者。姑准開俸。過限不獲。各罰俸三箇月。仍總計一年之內。除盡數拏獲。及拏獲一半免罪者。不計外。城內積至五起。城外十起以上。俱問罪降一級。文官仍調外用。

凡在外巡捕。成化二十一年。奏准。各處撫按等官。遇有報到賊情。卽行都布按三司分巡分守。及掌印官。嚴督捕盜官。兵人等緝捕。如有隱蔽賊情。不行開報。事發之日。應提問者。就便拏問。應參奏者。奏請拏問。內係一次二次不報者。住俸。挨捕三次不報者。戴罪。挨捕至四次以上不報者。不分軍民職官。俱監候。奏請降等敍用。○又奏准。各處盜賊生發。事干城池衙門。殺官劫庫劫獄。并積至百人以上者。限一月以裏。不獲。聽鎮守巡撫。巡按官。將分巡分守。守備及府州縣衛所。巡司掌印。巡捕官。住俸。戴罪。挨拏盡絕。照舊支俸管事。半年不獲者。俱聽巡按御史提問。三司掌印官。照依常例發落。其餘每一起。將州縣守禦千戶所。巡司掌印。巡捕官。并專一地方守備等項。及府衛巡捕官。降一級。每二起。府衛掌印官。降一級。每三起。分巡分守官。降一級。俱調邊遠去處。○弘治十三年。奏准。凡在外官庫被盜。銀至一千兩以上。一箇月不

獲經該衙門并巡捕官俱各住俸半年不獲提問被盜二三次者奏請降調其該道分巡分守官參奏調治不及前數者俱照常發落庫子儘其財產均追陪償候真贓得獲照數給還若各官妄拏平民逼認盜賊追陪者亦問罪降調○十六年議准通行山東河南江西南北直隸等處官兵人等果有對敵就陣擒斬有名劇賊一名顆者照依邊方事例陞一級世襲其擒斬隨從強賊三名顆并陣亡者亦陞一級世襲如不係對敵止是緝捕三名者陞一級不准世襲不及三名者給賞不係應捕人員亦一體陞級領軍把總等官部下擒斬有名劇賊五名顆以上者照依邊方事例陞實授一級部下擒斬從賊七十名顆以上者陞署一級五百名顆以上陞實授一級○嘉靖三十九年題准各省布按三司守巡并兵備府州縣等官若縱容盜賊不行擒捕十名以上州縣掌印巡捕官住俸戴罪五十名以上降俸一級立功自贖百名以上并將守巡兵備官參奏處治今後所屬地方果有強盜聚至十人以上兇惡顯著曾經將敵當陣生擒二名及斬首二顆者准陞一級不願陞者賞銀三十兩若不係臨陣止係緝捕者每名顆賞銀十兩擎獲竊盜一名者賞銀五兩夥內能自相擒斬者免其本罪仍一體陞賞經管官員酌量敘錄應賞銀兩先儘贖銀不敷之數於無礙銀兩動支○四十一年題准凡沿邊沿海及腹裏府州縣與衛所同住一城者及衛所自住一城者若遇大虜及盜賊生發攻圍不能固守或棄城逃走或開門延賊致賊進入殺虜男婦三十人以上燒毀官民房屋者衛所掌印官與專一捕盜官俱比照守邊將帥失陷城寨者律斬其府

州縣掌印官及捕盜官與衛所同住一城者不能竭力協守俱起送吏部降一級別用其餘府州縣不分各邊腹裏原無設有衛所但有專城之責者若有前項失事掌印捕盜官俱比照牧民官激變良民因而失陷城池律斬其自來不曾建立城池與雖設有城池被盜潛踪隱跡設計越城進入劫盜事出不測雖有前項失事俱不得比用此律守巡兵備止於參究治罪量事情輕重臨時奏請定奪○隆慶六年題准捕盜條格各州縣掌印巡捕官有盜至十名者降一級二十名者降二級三十名者罷其官各兵備及該道官所屬有盜合至五十名者降一級七十名者降二級百名以上者罷其官撫按官有隱匿不行參奏者聽兵部都察院及科道參奏重治若果地方有盜卽行申報上司就便捕滅上司官若聞地方有盜卽撥兵馬就便捕滅者免究仍錄敍其捕盜之功量多寡爲陞賞○萬曆元年令以後各該巡捕兵備官遇有強賊生發雖不係本管地方有能協力捕獲者該部紀錄擢用賊情重者仍行給賞該管地方官加等治罪○二年議准州縣但係無有城池去處倉庫被他境賊盜潛來打劫不論賊名多寡掌印巡捕官俱住俸戴罪緝捕過限不獲從撫按衙門提問降一級調邊遠用兵備及守巡駐劄該道俱照不及降用有城池州縣倉庫獄囚被劫掌印巡捕官俱問罪降二級調邊遠用兵備及守巡駐劄該道俱降一級調用州縣與衛所及守備官同城其守備及衛所掌印操捕官與有司一體問罪降級若衛所倉庫被劫專以衛所掌印操捕官問罪降級係本處嘯聚之盜所劫自守巡兵備與軍衛有司俱加一等隱匿不報者加

二等。○又議准。但強盜劫掠倉庫獄囚重大事情。不分有無殺人。俱各先行具奏。限三箇月以裏捕獲。如竊盜盜庫及監收人等。侵盜庫銀。止照律例問罪。不必具奏。其本處嘯聚之賊。必須著有姓名。不能訪擊。既行劫掠。仍聚不散。及拏獲之日。果係本管賊人數多。方坐前罪。○六年議准。城外民家被盜。各該府州縣衛所掌印巡捕官及守備守巡等官。俱照成化二十一年例。分別起數降調。城內各加一等。如果強盜於禁城殺人。方行參奏。○又議准。盜賊行劫。有司軍衛員役登時具報。以失盜之日爲始。過三日不報者。以隱匿論。府州縣掌印官及撫按司道。以各申文到日爲始。每一日以一百里爲限。計程違三日之外。以隱匿論。○十一年議准。府州縣係有城池。及設有衛所。被賊打劫倉庫獄囚。或殺死職官。或聚至百人以上者。撫按官就將各掌印操捕等官。先行參奏。住俸戴罪緝捕。限半年以裏。盡數拏獲免罪。如過限拏獲未盡。再限三箇月盡獲。亦准免罪。若全無拏獲。及再限內不能盡數拏獲者。不分軍衛有司。俱問罪降二級。文官送部。武官仍於本衛所。各調用。衛所失事。止坐衛所掌印操捕等官。兵備守巡并守備官。駐劄本城者。降一級調用。不係駐劄處所。止調用。若自來不曾設有城池者。掌印巡捕等官。止降一級。兵備守巡守備等官。分別罰治。沿邊沿海及腹裏府州縣與衛所同住一城。及衛所自住一城者。若遇大虜及盜賊生發。攻圍不行固守。而輒棄去。及守備不設。被賊攻陷城池。劫殺焚燒者。衛所掌印與捕盜官。俱比照守邊將帥失陷城池者律斬。府州縣掌印并捕盜官。與衛所同住一城。及設有守備駐劄本城者。俱比照守

邊將帥被賊入境內擄掠人民律發邊遠充軍其兵備守巡官駐劄本城者罷職爲民若非駐劄處所兵備守巡及守備官俱降三級調用若府州縣原無設有衛所但有專城之責者不分邊腹遇前項失事掌印捕盜官照前比律處斬兵備守巡官亦照前罷職降調其有兩縣同住一城及府州縣佐貳首領但分有守城信地各以賊從所管城分進入坐罪若無城池與雖有城池被賊潛踪隱跡設計越城進入劫盜隨即逃散不係失陷者止以失盜論俱不得引用此例各處民間被賊打劫即時擒獲者不分城內城外各掌印巡捕等官俱免罪一月之外不獲通行住俸候拏獲一半以上方准開支若中間能獲別起及別府州縣真正強盜及各越獄重囚亦准抵數但不許將照捕名數朦朧捉拏以圖抵飾仍通計一年之內除盡數拏獲及拏獲一半以上免罪者不計外城內積至五起城外及無城去處至十起以上不分軍衛有司掌印巡捕等官參究問罪俱降一級文官送部武官於本衛所各調用兵備守巡官分別罰治凡強盜打劫各該有司軍衛員役不分事情輕重務要登時從實申報如有隱匿者撫按官即將各該員役應提問者提問應參奏者就便參奏酌量情罪議擬上請不許容隱其撫按官遇有報到若係殺官劫庫劫獄并聚至百人以上或嘯聚不散及城內打劫至殺人者卽行奏報其民間被劫事情稍輕者類入歲報冊內年終具奏俱不許容隱違者聽部院該科參奏重治○又題准各處民間被盜打劫即時擒獲者不分城內城外各掌印巡捕等官俱免罪一月之外不獲通行住俸候拏獲一半以上方准開支城內積

至五起城外及無城去處至十起以上不分軍衛有司掌印巡捕等官參究問罪俱降一級文官送部武官於本衛所各調用凡強盜打劫有司軍衛俱要登時從實申報隱匿者聽撫按官參擬降罰○又令各軍屯與有司交錯去處照坐落地方屬兵備官管轄遇重大賊情併力逐捕如有失事該巡捕軍官亦聽兵備參呈撫按衙門提究各省直但有軍屯者俱照此例

凡東廠錦衣衛緝捕嘉靖二十七年題准行令廠衛每年終將各項獲功職役姓名勞績緣由首從的數備造文冊用印鈐蓋開送兵部附簿登記候至三年類奏下部查對相同仍行法司覈實應陞應賞遵照格例議擬覆奏其提督官酌量陞賞取自上裁間有奇功異績優錄出一時特恩者毋輒援引陳乞該衛鎮撫司鞫問各項罪犯事完具奏止開獲功人員的確首從名數用備查考毋輒議及陞賞○又例廠衛訪獲私造僞印硃符路引鎮撫司問明止照例給賞不許乞陞○四十二年題准廠衛緝訪止屬風聞待法司成獄方許紀功每當類奏該部同廠衛會題仍勅兵刑二部勘對明白請旨陞賞○隆慶元年題准如有緝獲真正奸細及妖言者不許私自訊考徑送刑部多方審究果有的據備取招由奏請係奸細者照例陞級係妖言者事大量陞事小量賞其餘子殺父母之類自有親族具告法司受理旗校人等不許羅織無辜希圖陞賞

明會典卷之一百三十七 兵部二十

【軍役】

按軍政條例甚多。凡內外勾解到部。其定衛斷發。及遇缺投充收補。與重冒存恤等項。屬職方司。其根捕勾補及清理挨查改編等項。屬武庫司。若職方司有首補者。卽行武庫司住勾。其司府册內有問發而無解到者。行武庫司會單查勾。二司雖各有所掌。亦互相稽核云。

凡衛所額軍。洪武二十六年定。內外衛所軍士。俱有定數。大率以五千六百名爲一衛。一千一百二十名。爲一千戶所。一百一十二名。爲一百戶所。其有衛分軍士數多。千百戶所統則一。每一百戶所。設總旗二名。小旗一十名。管領鈐束。大小相維。以成隊伍。管軍官員。操練撫綏。務在得宜。毋致紊亂空歇。

【收補】

凡收補軍士。洪武二十六年定。凡遇各布政司并直隸府州縣勾解內外衛所。逃故軍人正身。并戶丁到部。審實明白。逃軍照例斷發。有能自首者免罪復役。其補役戶丁。如在京衛分。填給勘合。差人送發該衛交割。在外衛所。送赴該府。通類差人押送。取收管回照。仍行移各衛收役。年老殘疾。發回兌換壯丁。其幼小戶下無丁者。年十三四以上。送衛操練。七八歲以下。或發在營。或發原籍依親。行移該衛紀錄。候長成。

勾補。其有奸頑故推老疾。不將壯丁補役者。問罪如律。仍勾壯丁。若長解不行。用心管解。以致脫逃。依律責限。發回根捕。受贓脫放。送法司問罪。其有民人首報投軍。并遠年歇役軍丁。首報著役。無衛分者。照發外衛。有原衛者。就發充軍。仍行原籍官司體勘。若有規避。送法司問罪。○又令內外衛所軍人。或有死亡。戶絕。或有障調。或爲事起發等項。缺下隊伍。須要行移衛所保勘明白。許令除豁。卽於多餘軍內撥補。若死亡止有幼丁。許令本衛紀錄。在伍作數。其在逃未獲。務要根勾正身。俱各不許撥補。○成化十三年。題准各處衛所軍人。陞職調衛等項。遺下弟姪義男女。塔及迷失鄉貫人等。有情願於附近衛所投軍者。保勘無礙。准令著役。○十九年。令各處清出迷失衛所軍人。及投充軍士到部。照例編發。缺軍衛分。法司問擬充軍犯人。定衛送該府押解。守哨犯人。送府押遞各處總兵官定撥。○又令各處解到軍士。每年輪委主事一員。驗其年力精壯者。送操聽調。其餘分撥雜差。○弘治三年。議准。置立收軍文簿。每都司一扇。每衛所各一扇。自弘治元年爲始。將發到來歷日期備細開寫。每年終將收過軍數造冊送部。在外問刑衙門問過軍犯。俱要抄招送部編發。若未經撫按等官詳允。照例行移刑部詳議。方與定衛。以後遇赦該都司衛所。務將各軍應否釋放緣由。申部待報釋放。○九年。題准。凡解到軍士。除附近兩京衛所。照舊解部轉發查理外。其餘衛所。置與印信文簿一扇。專委軍政掌印官。遇有解到。卽時填寫本軍并妻姓名。投批批週月日。差操處所。候分巡守備巡按等官。按臨弔查。若有情弊。聽各官參究發落。○十三年。奏定收

軍事例。除順天府所屬人民。并騰驤左等四衛。牧馬所軍餘。及各處逃移。不知下落之人。并正軍正匠外。其餘在京不分官員軍民匠役校尉之家。舍人餘丁。願投軍役者。造送兵部勘明。收充軍役。編入府軍前衛各所食糧。俱送團營操練。止充一輩。願當者聽。○正德四年。令各該衛所空閒餘丁。情願投軍者。准收充補伍。不許抑勒。并將有司民籍別衛軍丁。外方流寓之人。收補致生奸弊。○十年議准。凡祖父原充遠軍。子孫投附近衛所。冒頂異姓名伍作弊者。許自首。官旗免罪。軍發原衛著役。若不首。事發調極邊衛。其官旗參問賊罪。奏請調衛差操。○嘉靖元年奏准。在京七十二衛。俱照騰驤四衛事例。每五年一次。攢造編軍文冊。每衛一樣三本。一本送兵部。一本送戶部。一本留該衛存照。○三年奏准。各衛所官軍舍人餘丁。三丁以上。及京城在外原無身役壯丁。准抽選招收二萬四千名。以實營伍。止終本身。○十六年議准。各該軍衛有司衙門。凡官下舍餘軍下餘丁。如果戶族衆多。不係應襲聽繼之人。或民間空丁。寄籍空戶。不係逃犯聽解軍戶人數內。有情願投充軍伍者。給撥空閒屯田佃種。責令辦納子粒。務使軍屯領種適均。不致冒濫。事完之日。造冊奏繳。○三十年題准。每年終。布政司類造本省問發軍犯文冊。都司類造解到軍犯文冊。其永遠者。備開戶丁事產。直隸府州照各布政司。直隸衛所照各都司。一體類奏。申呈撫按。類造二項奏冊各一本。奏繳。青冊各一本。送部查考。兵部專委主事一員。逐一查對。如司府冊內有問發。而司衛冊上無解到者。就行武庫司會單發冊查勾。各作弊軍犯。及官吏人等。撫按依律究治。候造黃冊。

之年。各司府州縣備查所屬充發永遠軍犯。開行該管州縣。將本犯本房人丁事產。分出另立軍戶。係匠竈軍籍者。于本戶冊內備細開註。日後事故。俱于本戶本房丁內勾取。敢有止將正軍人丁。捏作旁枝。開作民戶者。事發官吏俱問枉法。

【重役】

凡重役。洪武二十三年。令天下衛所有一戶充軍二名者。免一名爲民。○二十六年。定有陳告一戶。或爲塚集。首報收集。或爲事問發在京在外衛所。重役充軍二名三名者。須行各衛著落當該官吏保勘明白。及揭照黃冊果係同戶。別無人丁。具奏定奪。其有爲事免罪充軍正身。并丁多者不准。如有隱瞞丁口。朦朧陳告者。問罪如律。○洪熙元年。令軍戶重役者。不問二處三處。止併一處。其餘悉與開豁。○宣德四年。令軍戶重役。止有幼丁二人者。出幼之日。以一丁補正役。一丁補軍餘。餘衛皆免。若調發別衛。而本衛又勾戶丁補役者。勘實發回。聽補見役衛分軍伍。其召募等項。見丁充軍事故。照名勾補者。先解一名。次其實有人丁申報。擬實定奪。○隆慶六年。詔軍戶有重役。不問三處五處。遇有事故。如果戶內人丁消耗。只併一處。勾丁補役。其餘悉行開豁。毋得展轉勾攝。剝削無辜。亦不許指此爲由。徇私賣放。空歇軍伍。違者各治以罪。○又令。凡各司府州縣除逃故祖軍的派戶丁。照例清解外。其餘勾單重隸者。止從改調衛所。其重役者。毋得妄解。佃戶。女戶。同姓名而異籍者。悉聽開豁。候各巡按清軍御史差滿。造冊送部。如軍衛

有司官不遵條約。朦朧占悛。或夤緣枉縱者。御史參究。

【冒名】

凡冒名。洪武二十六年定。有陳告本戶係是民籍。止與故軍同名同姓。被里甲人等賣放正軍。朦朧冒解者。發回合干有司提對。曾經府縣呈告不理。著令所管上司衙門歸問。若俱不理。必須給批差人。先提當該吏典。并事內干問人數。送法司對問。其有干問府縣官員具奏取問。若被在衛軍人供指。就便送法司對問。果係故軍生前妄報。坐名勾取者。揭照黃冊是實。改正發回爲民。仍行原衛著落親管官旗。挨勾應補正軍。○宣德四年。令民戶與軍姓名相同。冒勾解者。照例審實開豁。若同姓同名之人。已經到衛。食糧三年之上者。不准。○十年。令有妄指同姓同名爲軍者。雖有該部文移坐取。有司卽與保明。不許朦朧冒解。○正統二年。令軍丁訴告冒解者。暫收著役。行移照勘。果係冒解。改正爲民。妄告者。行本衛究治。○隆慶六年。詔軍戶有丁倒戶絕。并同名同姓。被人妄報。連年勾擾者。有司從公體勘得實。卽轉達該府兵部開豁。

【老疾】

凡老疾軍人。洪武十五年。令各衛軍士年老及殘疾。有丁男者許替役。所管官旗留難者。坐罪。○二十三年。令老疾軍。有子年一歲二歲。該紀錄者。皆與正糧。候成丁收役。不許別勾。以亂隊伍。○二十六年定。凡

內外衛所軍人。或征進工作傷殘。或患痼疾。及年老不堪征操者。須要保勘相驗是實。許令戶下壯丁代役。若無少壯。止有幼小人丁。許令該衛紀錄操練。仍令老疾隨營。如果戶絕無人。揭籍查勘明白。具奏除豁。聽令隨營。或依親還鄉。缺下軍伍。於多餘軍內撥補。○宣德四年。令故軍戶下。止有人丁年七十以上。或篤疾殘廢。不堪充軍者。保勘是實。明白回報定奪。不必起送。官吏人等。不許因而作弊。將不係老疾之人。朦朧妄報。脫免軍役。違者論罪。○成化十七年。奏准。幼軍有老疾者。相視明白。具奏疏放開伍。但逃者。仍勾其戶丁補役。其補役者。亦終本身。○弘治九年。題准。在京各衛所老疾軍人。力士奏放回者。除府軍前衛旗手衛。查勘明白。照例另行。其餘衛所軍匠。奏告兵部。仍送本衛所。查果年六十以上。著令營丁告部。行勘替役。若營無人丁。發冊原籍清勾解補。食糧應役之後。方許替回。其正軍病故。許令隨營子孫補役。若未出幼。紀錄在官。候出幼之日。差操食糧。經該官吏。若將前項情節。朦朧作弊。事發。照依律例。從重參究。○十八年。奏准。府軍前衛幼軍。審係原逃。年五十歲以下。無疾者。方解本身。若年五十以上。及老疾病故者。俱於各軍名下。勾取親男解補。若無親男。解戶內壯丁補伍。到衛應當十年以上。不曾脫逃者。老疾或病故之日。查勘是實。卽與開豁。不許勾丁。如或到衛脫逃。或當軍不及十年之上者。仍取戶丁再當一輩。仍要終身不逃。年老方許開豁。該衛所官吏。若有一向在伍老疾。應放之人。不行分豁。及違例妄收。年老正身。并逼令壯丁在逃。或將不該免之人。朦朧疏放。其有司官吏。或妄將五十以上老疾之人。起解

塘寨通行參究。仍三年一次查勘無礙。驗實疏放。○正德十五年奏准。幼軍在伍。十年不逃。并繼補戶丁。雖逃一次。重解復役。應當十年者。老疾照例除豁。○嘉靖四年題准。幼軍老疾。或年滿。於民間另僉。如將已當過者。一槩與逃軍發冊清勾。掇累先當人戶。照例開罪。○三十年議准。各該巡按。清軍御史。遇有原係府軍前衛。僉取侍衛。幼軍逃故。曾當一輩年久者。審實。取具供結。給免。事完造冊奏繳。仍照式造青冊二本。一本送部查照。一本行衛除名。以後再不許勾解。三十年以後。見役不逃者。年久病故。照例開豁。其老疾無用。照例三年一次奏查疏放。俱免勾補。如有逃回。係從來未及一輩者。亦不必勾丁解衛。務須根捉原軍著役。老疾故絕。亦免勾丁補伍。果係軍匠重役之家。亦聽免解。其自願應當者。俱照例行。不許幫貼。在逃一體根捉。與老疾故絕者。俱免勾解。戶丁凡有故違。俱各參提。從重究治。

【存恤】

凡存恤。宣德元年。令新勾到衛軍士。限半月收幫。月糧兩月。葺理房屋。俟其安定。方許差操。○四年。令天下衛所。每軍一名。免原籍戶下一丁差役。在營軍餘。亦免一丁。令專一供給。○又令。新勾軍士。照例收糧一箇月。經理居住。方許差操。若軍吏總小旗人等。違例虐害。在內監察御史。在外巡按御史。按察司官。及鎮守官員。巡察拏問。軍官具奏定奪。其原降榜文。都司衛所。置立板榜。各於公廳懸掛。永爲遵守。○正統二年。令科道兵部主事各一員。督同五城兵馬巡點存恤。有限內差撥。及私役科擾者。參奏問罪。其各衛。

仍委官一員專管。○又令各省解到新軍送存之日。給票月支米一石。三箇月滿日。該衛送驗軍主事處。驗發營操守衛各項差使。如有存恤後在逃者。復解不准存恤。徑驗差使。○三年。令新軍逃亡過二百人者。該衛存恤官。罰俸五箇月。過百人者三箇月。不及百人者兩箇月。在外衛所。依在京例。仍從巡按按察司官點視。○成化十二年題准。凡在京存恤等官。及在外清軍御史。督同委官。每年十月終。查有官旗不行鈐束撫恤軍士。致令在逃者。量其多寡扣算。參究拏問。若軍人畏懼差操。自行逃躲者。並以軍政條例問究。○弘治五年。令清軍管屯官。將原係衛所營房屯地。見在住種空閒等項。逐一查明。造册在官。候解到新軍。及見軍無棲止。卽將空餘屋地量撥住種。官豪侵占者。行令改正免罪。若軍人自置民間地土。不在此例。○七年題准。各守巡兵備官。凡遇出巡。將所在衛所解到軍士。逐一查審。要見某軍。何年月日解到。曾否存恤。見在某處差操。某軍在逃。有無剝削賣放情弊。查過按季開報。合于撫按查考。○十一年題准。凡官旗將存恤新軍。收糧未滿三月。輒便撥與重差者。問擬違制罪名。其巧立名色。勒財贓未滿貫。及逼令逃竄五名以上者。京衛調外衛。外衛調邊衛。分各帶俸差操。遇革不宥。其各衛所掌印官。斟酌輕重。參奏治罪。○十三年奏准。內外都司衛所。求索新軍財物。因而逼勒在逃者。指揮十名以上。千戶鎮撫六名以上。百戶四名以上。各問罪降一級。每十名六名。四名。各照數遞降。若不及數。及不曾得財者。照常發落。其存恤滿日。若受財賣放。贓至滿貫者。立功滿日。京衛調外衛。外衛調邊衛。邊衛調極邊衛。差操不許

管軍管事。○正德六年題准軍丁各照例優免一丁。在營有餘丁亦免一丁差使。其在三千里外衛所當軍者原籍本營亦准各免二丁。專一供給軍裝軍衛有司敢有仍前科擾者被害軍丁徑赴清軍御史并巡按御史處告理查究。問以贓罪。○八年題准凡各清軍御史將解到新軍不拘遠近務照例幫支月糧不許差撥科擾必待三箇月食糧滿日方許揀選不許官旗人等科擾逼迫在逃違者參奏拏問照例降級。○十年令遇有解到民間僉補例不勾丁力士校尉務要嚴督該管官旗用心存恤中間若有病故而無人告給明文者從實開報本衛發册原籍另僉點相應之人解替若有求索財物逼迫逃回者事發定行究治其本身在衛老疾與解到逃回病故老疾不堪解補及起解不到者悉照舊例施行。○嘉靖三十年令各都司衛所遇有解到新軍若指稱使用等項名色科索凌辱一年之內逼累在逃者照依賣放軍人納包月錢事例不問指揮千百戶鎮撫但五名以下問罪降一級六名以上降二級十名以上降三級甚者罷職發邊衛充軍。○隆慶六年題准凡將官不善撫恤致有逃亡二分以下者附過三分以下者降一級五分以下者降二級年終兵備報督撫會奏。○萬曆八年題准將旗手等衛蕃牧等所專設存恤指揮千百戶俱革其一應事宜行令該衛僉書兼管每年終科道官一體舉劾如遇考選填註考語以憑黜陟。

【僉充民壯】【機兵附】

軍籍之外有民壯有司僉點以備警急卽古民兵之遺意今附于軍役之後

洪武初立民兵萬戶府簡民間武勇之人編成隊伍以時操練有事用以征戰事平復還爲民有功者一體陞賞○正統十四年令各處召募民壯就令本地官司率領操練遇警調用事定仍復爲民○天順元年令召募民壯鞍馬器械悉從官給本戶有糧與免五石仍免戶下二丁以資供給如有事故不許勾丁○弘治二年令選取民壯須年二十以上五十以下精壯之人州縣七八百里者每里僉二名五百里者每里三名三百里者每里四名一百里以上者每里五名春夏秋每月操二次至冬操三歇三遇警調集官給行糧其餘照天順元年例○六年令官司私役民壯者照依私役軍例問罪○十一年題准每十年通行查審民壯一次中間但有年老殘疾病故人丁消乏悉與僉換若本戶見有壯丁十名以上家道殷實者仍於本戶內僉取壯丁更替一輩事故不許僉補操守城池之外不許別占敢有仍前作弊照例降參○嘉靖元年題准江南機兵各照里分多寡量其丁產審僉應役較習武藝每一州縣多不過一二百名農忙之時非有緊急聽其務農不許雇覓遊手代當官府亦不得差遣勾攝迎送○六年令各處撫按官通行各府州縣查照民壯原設之數量爲減革其存留者分爲上下兩班一班務農一班操練武藝委佐貳官一員管領若有重大賊情方許通調候事寧仍舊輪班違者罪之○八年令民壯人戶消乏者聽各該巡撫官計處酌量存減見在民壯務要僉選精壯人役冬月農隙如法操練止許各守地方不許司

府調集團操。其餘免操月分。不許稽留在官。以妨民事。官司敢有擅差勾攝。及學習吹鼓。迎接上司等項。俱從重究治。

